

POPERA GA DUMAWA YEXMAGÜXÜ GA YAXÖGÜXÜTANÜWA NAMUXÜ GA PAURU

**Pauru rü nüxü narümoxe ga yema
yaxögüxü ga Dumaärü ñanewa yexmagüxü**

1 ¹Pa Chaueneëgüx, choma i Pauru nixi i pexçax chanaxümatüxü i ñaã popera. Rü choma nixi i Ngechuchu ya Cristuarü duüxü chiixü. Rü choma nixi ga Tupana choxü yaxuxü na choxü yamuxüçax na duüxügümaã nüxü chixuxüçax i norü ore i mexü i tüxü maxëëëxü. ²Rü nuxcümamaxüchima Tupana nanamu ga norü orearü uruüğü na naxümatügüäxüçax ga norü ore i mexü. Rü yemaäcü tüxü nüxü nacuxëë ga ñaã ore i mexü. ³Rü ñaã ore i mexü rü törü Cori ya Ngechuchu ya Cristuchiga nixi. Rü nüma rü woo Tupana Nane na yïixü, natürü duüxügürüü nabu ga yexguma ñoma ga naãnewa nanguxgu. Rü nuxcümaücü ga äëxgacü ga Dabítaa nixi. ⁴Natürü nümatama ya Ngechuchu rü üünecü nixi. Rü yexguma yuwa ñadaxgu rü Tupana tüxü nüxü nadauxëë na aixcüma Nanexüchi na yïixü. Rü nüxna nanaxä ga guxüma ga pora. ⁵Rü Ngechuchu ga Cristugagu nixi ga chomaã namecümamaxü

rü choxü naxunetaxü ga Tupana na norü puracü chaxuxüçax. Rü yemaçax Ngechuchuégagu choxü namu na guxü i nachüñanewa nüxü chixuxüçax i norü ore na yaxögüäxüçax i duüxügü rü Tupanaga naxinüëxüçax. ⁶⁻⁷Rü pema rü ta, Pa Dumacüäxgüx, rü ngëma duüxügütanüwa pengëxmagü yerü Tupanaäxü peyaxögü rü naga pexinüë. Rü nüma rü pexü nangechaü rü marü pexü naxuneta na Ngechuchu ya Cristuarü duüxügü pixigüxüçax rü ngëma norü duüxügütanüxü na pexigüxüçax. Rü ñuxmax, Pa Chaueneëgü i Dumacüäxgüx, rü chanaxwaxe i nüma ya Tanatü ya Tupana rü törü Cori ya Ngechuchu ya Cristu pemaã namecümagü rü pexü narüngüxëëgü na meã pexü naxüpetüxüçax rü aixcüma petaäëgüxüçax.

**Pauru rü nüxü nangüchaü na
íyadauäxü ga yema yaxögüxü ga
Dumawa yexmagüxü**

⁸Rü ñuxma rü Ngechuchu ya Cristuégagu Tupanana moxë chaxä

pexcax, erü guxũwama i guxũ i nañewa rü duũxũgü nüxũ nixugügü na aixcuma Cristuaxũ peyaxögüxũ rü Tupanacax pemaxẽxũ. ⁹Rü nüma ya Tupana choxũ nadau rü nüxũ nacuax na aixcuma guxũguma pexcax chayumüxẽxũ. Rü yimaãxũ nixĩ i guxũma i chorü ngúchaũmaã chapuracüxũ rü nüxũ chixuxũ i norü ore i mexũ i Nanechiga. ¹⁰Rü guxũguma nüxna chaca na choxũ ngẽma namuxũcax rü ngẽmaãcü düxwa pexũ íchayadauxũcax ega norü ngúchaũ yixĩgu. ¹¹Erü aixcuma choxũ nangúchaũ na pexũ chadauxũ na pemaã nüxũ chixuxũcax i Tupanaärü ore na aixcuma meã peyaxögüxũcax rü yexeraãcü peporaexũcax. ¹²Rü ngẽxguma ngẽmaãcü wüxiwa ingẽxmagügu, rü tá wüxichigü yigü tataãëgüxẽ rü yigüaxũ tanangúchaũxẽ. Erü choma rü tá nüxũ chadau na ñuxãcü tórü Coriaxũ peyaxögüxũ rü pema rü tá ta nüxũ pedau na ñuxãcü chayaxõxũ. ¹³Pa Chaueneëgüx, chanaxwaxe i nüxũ pecuax na muẽxpüxcüna pexũ íchayadauxchaũxũ, natürü ñuxmarüta rü choxũ naguxcha. Natürü ngẽma petanüwa chaxũxchaũ, erü chanaxwaxe na pemaã nüxũ chixuxũ i Tupanaärü ore yema toxnamana yexmagüxũ ga duũxũgümaã nüxũ chixuxũrüü. Erü chanaxwaxe i ngẽma duũxũgürüü meã peyaxögü na ngẽmaãcü Cristuwe naxĩxũcax i ngẽma petanüxũgü i ñuxma tama yaxögüxũ. ¹⁴Rü aixcuma ngẽma changuxchaũ erü nümatama ya Tupana choxũ namu na guxũ i duũxũgümaã nüxũ na chixuxũcax i norü ore. Rü nanaxwaxe i duũxũgü i meã poperaxũ

icuáxũmaã nüxũ na chixuxũ rü duũxũgü i tama poperaxũ icuáxũmaã ta nüxũ chixuxũ i ngẽma norü ore. Rü ngẽxgumarüü ta nanaxwaxe na ngẽma duũxũgü i cuax nüxũ ngẽxmaxũmaã nüxũ na chixuxũ rü ngẽma duũxũgü i taxuguma rüxĩnüëxũmaã nüxũ na chixuxũ. ¹⁵Rü ngẽmacax, Pa Chaueneëgü i Dumagu Áchiũgüxũ, rü choma rü marü íchamemare na petanüwa na chaxũxũ, na pemaã rü ta nüxũ chixuxũcax i Tupanaärü ore i mexũ.

Tupanaärü ore rü napora

¹⁶Rü taxucaxma naxcax chaxãne i ngẽma ore i mexũ. Erü ngẽma ore rü napora, rü ngẽmamaã nixĩ i napuracüxũ ya Tupana na guxãma ya yixema Cristuaxũ yaxögüxe rü tüxũ nangẽxmaxũcax i maxũ i taguma gúxũ. Rü ngẽma maxũ, rü Yudfugüçaxirachirex nixĩ, natürü i ñuxma rü guxũma i ngẽma tama Yudfugü ixĩgüxũcax rü ta nixĩ. ¹⁷Rü ngẽma norü orewa nixĩ i tamaã nüxũ yaxuxũ ya Tupana na tórü õgaguxicatama yĩxũ na napexewa imexũ. Erü norü ore i umatüxũwa rü ñanagürü:

“Rü yixema tümaärü õgagu
Tupanapexewa mexẽ, rü tá
tüxũ nangẽxma i maxũ i
taguma gúxũ”,

ñanagürü.

Nagagutama nixĩ i duũxũgü inapoxcuexũ

¹⁸Rü nüxũ tadaugü na Tupana daxũgüxũ i nañewa ne namuxũ i norü poxcu i ñücümamaxũ naxcax i guxũma i

ngēma duūxūgū i tama naga ĩnūēxū rū
 chixexū ūgūxū rū ngēma norū
 chixexūmaā togūaxū naguxchaxēēgūxū
 na tama nūxū nacuaxgūxūcax i ngēma
 ore i aixcūma ixīxū. ¹⁹Rū ngēma
 duūxūgū i chixexū ūgūxū rū meā nūxū
 nacuaxgūchirex na ĩnuxācū yīxū ya
 Tupana yerū nūmatama ga Tupana rū
 marū nūxū nūxū nadauxēē ga yema.
²⁰Rū woo tama nūxū idaugūgu ya
 Tupana, natūrū guxūma i tacū i
 naxūxūwama nixī i nūxū idaugūxū. Rū
 yexguma noxri naāne naxūxgumama
 nixī ga meāma duūxūgūxū nūxū
 nadauxēēxū na aixcūma Tupana na
 yīxū rū guxūguma na naporaxū. Rū
 ngēmacax i ngēma duūxūgū i chixexū
 ūgūxū, rū taxucūrūwama tacūmaā nūgū
 ĩnapoxūgū i Tupanapexewa. ²¹Yerū woo
 nūxū nacuaxgūchirex na ĩnuxācū yīxū
 ga Tupana, natūrū tama
 nanayauxgūchaū na norū Tupana
 yīxūcax, rū bai na moxē nūxna
 naxāgūxū. Natūrū yema ore ga
 taxuwama mexūguama narūxīnūē, rū
 yemaācū naēchitamare namaxē rū
 yexeraācū chixexūgu narūxīnūē. ²²⁻²³Rū
 nūgū yaxugūegu rū duūxūgū i nūxū
 icuāxū nixīgū natūrū taxuguma
 narūxīnūē. Yerū nūxna nixīgachitanū ga
 Tanatū ya Tupana ya mexēchicū ya
 taguma yucū, na nawe naxīxūcax ga
 norū naxchicūnaḡāgūmare ga duūxūgū i
 yuxwaxexūchicūnaḡāmare ixīgūxū rū
 werīgūchicūnaḡāmare ixīgūxū rū
 naēxūgūchicūnaḡāmare ixīgūxū rū
 āxtapegūchicūnaḡāmare ixīgūxū. ²⁴Rū
 yemacax ga Tupana rū dūxwa yemawa
 nanawogū ga yema duūxūgū na
 naxūgūāxūcax ga guxūma ga yema

chixexū ga nūxū ngūchaūgūxū rū
 nūgūmaā na naxūgūāxūcax ga
 naxūneārū ngūchaūgū i āne tūxna āxū.
²⁵Rū yemaācū nūxna nixīgachi ga guma
 aixcūmaxūchi Tupana ixīcū na nawe
 naxīxūcax ga norū tupanagū ga tama
 aixcūma ixīgūxū. Rū yema Tupana
 ūxūpexewa nayumūxēgū rū yemāxū
 nicuāxūūgū, natūrū tama nūxū
 nicuāxūūgū ga Tanatū ya Tupana ga
 naxīcū rū inaxwaxecū na guxūguma
 nūxū icuāxūūgūxū. Rū ngēmaācū yixī.
²⁶Rū yemacax ga Tupana rū dūxwa
 yemawa nanawogū ga yema duūxūgū
 na naxūgūāxūcax ga naxūneārū
 ngūchaū i āne tūxna āxū. Rū aīxruū ga
 ngexūgū rū naxrūū ngexūgūmaātama
 nangēāēgū rū tama yatūgūmaā. ²⁷Rū
 yexgumarūū ta ga yatūgū rū naxrūū
 yatūxūmaātama nangēāēgū, rū tama
 ngexūgūmaā. Rū yema naxūneārū
 ngūchaū ga chixexūgū rū nūxū natora
 na naxrūū yatūxūmaā namaxēxū. Rū
 yemaācū ga yema yatūgū rū nūgūmaā
 nanaxūgū ga yema naxūneārū ngūchaū i
 āne tūxna āxū, rū dūxwa yemagagu
 niḡaawee rū naturaxūnegū. ²⁸Rū yema
 na tama Tupanaxū nacuaxgūchaūxū, rū
 yemacax ga nūma ga Tupana rū dūxwa
 yemawa nanawogū ga yema duūxūgū
 na norū chixexūgu na
 naxīnūēēchaxūcax rū na naxūgūāxūcax
 ga yema chixexū. ²⁹Rū dūxwa ga yema
 duūxūgū rū guxūraūxū ga chixexū
 naxūgū ga Tupanapexewa. Rū tama
 aixcūma meā naxmāxmaā rū natemaā
 namaxē. Rū naxaū rū nūgūnaxīcatama
 nananugūchaū i guxūma i tacū. Rū
 toguāxū nachixexēēgūchaū. Rū
 nixāūxāchiwaxegū, rū namāētagū, rū

nanuēwaxe, rü nawomüxēēwaxegü, rü naxüñeärü ngüchaü nüxü napora, rü naxoregütaaxgü. ³⁰Rü chixexümaā toguāxü nixugüe, rü Tupanachi naxaie, rü toguāxmaā naguxchigagü. Rü nügügu naxüñüēgu rü togüariü yexera nixigü, rü nügü nicuaxüügü. Rü naxcax nadaugü na yexera chixexü naxügüxü. Rü tama nanatüga rü naēga naxüñüēchaü. ³¹Rü tama inarüxüñüēchaü. Rü tama aixcuma nayanguxēē i ngēma nüxü yaxugüxü. Rü taxüexüma nangechaügü. Rü tama togüaxü nüxü nangechaü i tacü rü guxchaxü. Rü tama toguāx nüxü tangechaütümüügü. ³²Rü nümagü i ngēma duüxügü rü meāma nüxü nacuaxgüchirex rü Tupana rü marü namaā nanaxuegu na noxtacüma nayuxü i ngēma duüx-ügü i ngēmaäcü maxëxü. Natürü woo meāma nüxü nacuaxgüchirex i guxüma i ngēma, natürü nanaxügiama i ngēma chixexü, rü nataäēgü ega togü naxüxgu.

**Ngëxguma Tupana duüxügüxü
poxcugu, rü tama chixexü naxü, erü
ngēma duüxügü rü norü
chixexügagutama nanapoxcue**

2 ¹Rü ngēmacax, Pa Duüxüx, rü woo texé quixügu rü taxuacüma Tupanapexewa cugüētüwa cuchogü, ega togüxü quixuechagu. Erü ngëxguma togüxü quixuechagu na nachixexü rü cugütama cupoxcu, erü cuma na cumücüxü quixuechaxü rü cuma rü ta cunaxü i ngēma chixexü i cumücüxü naxcax quixuechaxü. ²Rü nüxü tacuax rü Tupana tá nanapoxcue i ngēma duüxügü i namücügüxü ixügüechaxü. Rü ngëxguma napoxcueägu, rü tama

chixexü naxü ya Tupana, erü ngēma duüxügü rü norü chixexügagutama nixü i napoxcueäxü. ³Rü dücax, Pa Duüxüx, rü ngëxguma togüxü quixu-echagu, natürü cuma rü ta cunaxüxgu i ngēmatama chixexü i nüma naxüxü, ¿rü ñuxücürüwa tá i nagu curüxüñüxü na Tupanachaxwa iquicüxü na tama cuxü napoxcuxücax? ⁴¿Rü tüxcüü tama nagu curüxüñü i ngēma mexü i Tupana cuxcax üxü? Nüma rü poraäcücüchi cumaā namecüma rü yaxna cumaā naxüñü rü tama paxa curü chixexücax cuxü napoxcuchaü. ¿Rü ñuxma rü tüxcüü nüxü cuxo? ¿Tama exna nüxü cucuax na Tupana ngēmaäcü cumaā mecümaxü na nüxü curüxoxücax i curü chixexü rü naxcax na cumaxüxücax ya Tupana? ⁵Natürü cuma rü tama Tupanaxü cucuáxchaü rü tama nüxü curüxoxchaü i curü chixexü. Rü ngēmaäcü cugücaxtama cunayexeraxēē i curü poxcu i tá cuyaxuxü i ngēma ngunexü i nagu Tupana napoxcuexü i ngēma chixexü ügüxü. Rü ngēma ngunexügu rü Tupana tá aixcuma ngēma duüxügümaā nanaxuegu na ñuxäcü tá na napoxcueäxü. ⁶Rü ngëxguma tá nixü i Tupana nüxü yaxügütanüxü i wüxichigü i duüxü naxcax i ngēma naxügüxü. ⁷Rü maxü i taguma gúxümaā Tupana tá tüxü nanaxütanü ya yíxema guxüguma mexü taxügüäcüma naxcax daugüxe na Tupana tümamaā taäëxü rü naxcax daugüxe na aixcuma Tupanaxütawa tangugüxü. ⁸Natürü Tupana tá tümamaā nanu rü tá tüxü napoxcu ya yíxema tügüguxicatama rüxüñüëxë rü tama naga ñnüēchaüxë i ore i aixcuma

ixīxũ rü naxçax daugũxe na ngẽma chixexũ taxũgũxũ. ⁹Rü guxũma i ngẽma duũxũgũ i chixexũ ügũxũ rü tá ngúxũ ningegũ rü poraäcũ tá chixexũ nüxũ naxüpetũ. Rü ngẽma Yudfugũ i chixexũ ügũxũxira tá nixĩ i Tupana inapoxcuxũ. Rü ngẽmawena rü tá nanapoxcue i guxũma i ngẽma togũ i duũxũgũ i chixexũ ügũxũ. ¹⁰Natürũ ngẽma duũxũgũ i mexũ ügũxũ, rü Tupana tá namaã nataãe, rü tá nanatachigaxẽe, rü tá nanataãẽxẽe. Rü ngẽma Yudfugũ i mexũ ügũxũçaxira tá nixĩ i ngẽma. Rü ngẽxgumarũ i guxũma i togũ i duũxũgũ i mexũ ügũxũçax rü tá ta nixĩ. ¹¹Erũ Tupanapexewa rü nawũxigu i ngẽma duũxũgũ i Yudfugũ ixĩgũxũ rü ngẽma togũ i duũxũgũ i tama Yudfugũ ixĩgũxũ. Rü guxãma ya texé ya chixexũ ügũxe rü tá tanayaxu i tũmaãrũ poxcu, natürũ guxãma ya texé ya mexũ ügũxe rü tá Tupana tũmamaã nataãe. ¹²Rü guxũma i duũxũgũ i pecadu ügũxũ i tama nüxũ cuaxgũxũ i ngẽma mugũ ga Moĩché ümatũxũ, rü tá inayarũtauxe. Rü ngẽxgumarũ ta i guxũma i ngẽma pecaduaxgũxũ i nüxũ cuaxgũxũ i ngẽma mugũ ga Moĩché ümatũxũ, rü ngẽma mugũ nüxũ ixuxũãcũma Tupana tá nanapoxcue. ¹³Erũ Tupanapexewa rü taxuwama name i ngẽma duũxũgũ i nüxũ inũẽmarexũ natürũ tama nagu maxẽxũ i norũ mugũ. Natürũ ngẽma duũxũgũ i Tupanaãrũ mugũga inũẽxũ nixĩ i aixcũma Tupanapexewa imexũ. ¹⁴Dücax, i ngẽma duũxũgũ i tama Yudfugũ ixĩgũxũ. Nũmagũ rü tama nüxũ nacuaxgũ i Tupanaãrũ mugũ. Natürũ ngẽxguma nüẽchamatama naxügũmareãgu i ngẽma Tupana tũxũ

muxũ, rü tũxũ nüxũ nadauxẽe na nüxũ nacuaxgũxũ i tacũ na yĩixũ i mexũ rü tacũ na yĩixũ i chixexũ, woo tama nüxũ na nacuaxgũchirẽxũ i Tupanaãrũ mugũ. ¹⁵Erũ nacũmagũwatama nixĩ i tũxũ nüxũ nadauxẽẽxũ na nüxũ nacuaxgũxũ na tacũ yĩixũ i mexũ rü tacũ na yĩixũ i chixexũ. Rü ngẽma duũxũgũ rü ngẽxguma chixexũ naxügũgu, rü naãẽwatama nixĩ i nüxũ nacuaxgũxũ na nachixexũ i ngẽma naxügũxũ. Rü ngẽxgumarũ ta i ngẽxguma mexũ naxügũgu, rü naãẽwatama nixĩ i nüxũ nacuaxgũxũ na namexũ i ngẽma naxügũxũ. ¹⁶Rü ngẽma ngunexũ i nagu Tupana Cristuxũ namuxũ na guxũ i duũxũgũxũ yacagũxũçax i norũ maxũchiga, rü ngẽma duũxũgũ i tama Tupanaãrũ mugũxũ cuaxgũxũ rü naãẽwa tátama nixĩ i nüxũ nacuaxgũxũ na chixexũ naxügũxũ rü exna mexũ naxügũxũ. Rü ngẽxguma tá nixĩ i nangóxũ i guxũma i ngẽma chixexũ i cũãcũma naxügũxũ i duũxũgũ, rü ngẽma chixexũ i nüxĩcatama nagu naxĩnũẽxũ. Rü Tupanaãrũ ore i pemaã nüxũ chixuxũ nixĩ i tũxũ nüxũ cuaxẽẽxũ i ngẽma.

Yudfugũchiga rü mugũ ga Moĩché ümatũxũchiga

¹⁷Natürũ pema Pa Chaueneẽgũ i Yudfugũx, rü ñaperũgũgũ:

“Toma rü Yudfugũ tixĩgũ rü meãma nüxũ tacuax i Tupanaãrũ mugũ ga Moĩché ümatũxũ”, ñaperũgũgũ. Rü ngẽmaãcũ nagu perũxĩnũe na Tupanapexewa pimexũ erũ meãma nüxũ pecuax i ngẽma Tupanaãrũ mugũ ga Moĩché ümatũxũ. Rü ngẽmaãcũ

Tupanamaã pegü picuaxüügü erü nagu perüxĩnũe na Tupana pexũ nangechaũxũ erü Yudfugü pixĩgü. ¹⁸Rü nüxũ pixu na meãma nüxũ pecuáxũ i tacü nixĩ i Tupanaãrũ ngúchaũ rü tacü nixĩ i mexũ rü tacü nixĩ i chixexũ. Rü Tupanaãrũ mugüwa naxçax pengúe na naxçax pedauxũ i ngẽma aixcũma mexũ ixĩxũ. ¹⁹Rü pema rü ñaperügügü:

“Toma rü meãma nüxũ tacuax na tanaxucuxẽxũ i ngẽma togü i duũxũgü i tama Tupanaxũ cuaxgũxũ. Rü meãma nüxũ tacuax na itayanawexächixẽẽxũ i ngẽma togü i chixexũwa ngẽmagũxũ”, ñaperügügü. ²⁰Rü pema nagu perüxĩnũegu rü nüxũ pecuax na ñuxacü penaxucuxẽxũ i ngẽma togü i duũxũgü i tama Tupanaxũ cuaxgũxũ rü ñuxacü penangúexẽẽxũ i ngẽma duũxũgü i ngexwacax yaxõgũxũ. Rü ngẽmaacü nagu perüxĩnũe na togüarũ ucuxẽruũgü pixĩgũxũ, erü Tupanaãrũ mugüwa pengúe rü ngẽmacax meãma nüxũ pecuax i tacü nixĩ i mexũ rü tacü nixĩ i ore i aixcũma ixĩxũ. ²¹Rü dücax, Pa Chaueneëgü i Yudfugũx, pema na togũxũ pengúexẽẽxũ, ¿rü tũxcũũ tama pegütama pengúexẽẽ? Pema nüxũ pixu na tama namexũ na ingĩxũ, ¿rü tũxcũũ i pema ipengĩẽxũ? ²²Rü pema nüxũ pixu na tama namexũ na naĩ i ngemaã ipexũ, ¿rü tũxcũũ i pema i ngẽmaacü pemaxẽxũ? Rü pema na naxchi pexaieũ i togüarũ tupanagünetachicünaxãgü, ¿rü tũxcũũ i naxçax pengĩẽxũ i norü tupaucagüarũ ngẽmaxũgü? ²³Pema nüxũ pixu na namexũ i Tupanaãrũ mugü i ümatũxũ, rü petaãẽ erü meã nüxũ pecuaxgü i ngẽma mugü. Natürü Tupanamaã

chixexũ pexũe, erü tama naga pexĩnũe i ngẽma pexũ namuxũ i norü mugüwa. ²⁴Rü ngẽmacax i Tupanaãrũ ore i ümatũxũwa rü ñanagürü:

“Rü pegagu nixĩ na chixri
Tupanachiga yadexagũxũ i
ngẽma duũxũgü i tama
Yudfugü ixĩgũxũ”,

ñanagürü. ²⁵Pema rü pegü ípewiechaxmüpexechiraũgü na Tupanaãrũ duũxũgü pixĩgũxũçax. Rü name nixĩ na penaxũxũ i ngẽma, ega aixcũma naga pexĩnũegu i Tupanaãrũ mugü. Natürü ngẽxguma chi tama naga pexĩnũegu i Tupanaãrũ mugü, rü woo Yudfugü pixĩgũgü, natürü Tupanapexewa rü taxuwama pexũ name i ngẽma na pegü ípewiechaxmüpexechiraũgũxũ. ²⁶Rü ngẽma togü i duũxũgü i tama nügü íwiechaxmüpexechiraũgũxũ, rü woo tama ngẽma naxũgũgü, natürü Tupanaãrũ duũxũgü tá nixĩgü ega naga naxĩnũegu i norü mugü. ²⁷Rü dücax, Pa Chaueneëgü i Yudfugũx, rü ngẽma duũxũgü i tama íwiechaxmüpexechiraũgũxũ natürü naga ñnũexũ i Tupanaãrũ mugü, rü ngẽma duũxũ rü tá Tupana-pexewa pexũ nixu na ñuxacü pechixexũ. Rü ngẽmaacü tá pexũ naxüpetü erü tama naga pexĩnũe i Tupanaãrũ mugü i woochirex na nüxũ pecuáxũ i ngẽma mugü, rü woochirex na ípewiechaxmüpexechiraũgũxũ. ²⁸Rü dücax, rü tama ngẽma na Yudfuxacügü pixĩgũxũçax nixĩ na aixcũma Tupanaxacügü pixĩgũxũ. Rü tama ngẽma na ípewiechaxmüpexechiraũgũxũçax nixĩ na Tupanaãrũ duũxũgü pixĩgũxũ. ²⁹Erü yíxema aixcũma tũmaãrũ maxũnewa Tupanaga ñnũex tixĩ ya aixcũma Tupanaxacü ixĩxẽ. Rü ngẽxguma aixcũma

taāēwa yaxōxgu nixĩ i aixcūma Tupanaārũ iixĩũ. Rũ Tupanaāē i Ūinexũ nixĩ i tũxũ rüngũxēxũ na yaxōxũcax, rũ tama ngēma mugũ ga Moiché ūmatũxũgagu nixĩ. Rũ yixema aixcūma Tupanaārũ iixĩē, rũ Tupana rũ tũmamaā nataāē woo duũxũgũ tama tũmamaā taāēgũgu.

3 ¹¿Rũ ñuxma rũ tacũwa tũxũ namexũ na Yudũgũ iixĩgũxũ? ¿Rũ tacũwa namexũ na fiwiechaxmũpexechiraũgũxũ? ²Rũ poraācũxũchima tũxũ name na Yudũgũ iixĩgũxũ. Yerũ nũma ga Tupana rũ tũxnaxũchi nixĩ ga naxāāxũ ga norũ mugũ i ūmatũxũ. ³¿Rũ tacũ tá ngupetũxũ i ñuxma ega ñuxre i tatanũxũ i Yudũgũ rũ tama meā yanguxēēgũāgu i ngēma Tupana tũxũ muxũ? ¿Rũ pexcax rũ ngēmacax tātũtama yanguxēēāxũ ya Tupana i ngēma tamaā inaxunetaxũ? ⁴Rũ tama ngēmaācũ nixĩ. Erũ woo guxũ i duũxũgũ rũ yadorataxgũgu, natũrũ Tupana rũ taguma nidora rũ guxũguma nayanguxēē i ngēma nũma tamaā inaxunetaxũ. Rũ yemacax norũ ore ga Dabĩ ūmatũxũwa rũ ñanagũrũ:

“Cumax, Pa Tupanax, rũ aixcūma nixĩ i curũ ore i nũxũ quixuxũ. Rũ ngēxguma cuxũ tangugũgũgu rũ nũxũ tadaugũ na aixcūma cumexũ”, ñanagũrũ. ⁵Natũrũ duũxũgũ rũ ínatiē erũ ñanagũrũgũ:

“Rũ nüētama nixĩ na chixexũ ixũgũxũ erũ ngēmaācũ yexeraācũ nangox na namexũ ya Tupana”, ñanagũrũgũ. Rũ ñanagũrũgũ ta:

“Rũ ngēxguma chi tórũ chixexũgagu yexeraācũ nangoxgu na aixcūma

namecũmaxũ ya Tupana, rũ maneca tama name ya Tupana ega tórũ chixexũcax tũxũ napoxcuegu”, ñanagũrũgũ. ⁶Natũrũ ngēma ñaxũgu na naxĩnũēxũ i duũxũgũ rũ poraācũ ínatiē, erũ tama ngēmaācũ nixĩ. Erũ ngēxguma chi tama namexgu ya Tupana, ¿rũ ñuxācũ chi i meā duũxũgũxũ yacagũxũ i naāneārũ guxgu? ⁷Natũrũ i duũxũgũ rũ ñanagũrũgũ:

“Rũ ngēxguma chi chorũ chixexũgagu yexeraācũ nangoxgu na ñuxācũ aixcūma namexũ ya Tupana, ¿rũ tũxcũ yĩxũ i choxna naçaxũ naxcax i chorũ chixexũ rũ choxũ napoxcuxũ naxcax i ngēma?” ñanagũrũgũ. ⁸Natũrũ ngēma ñaxũgu na naxĩnũēxũ i duũxũgũ rũ poraācũ ínatiē. Erũ ngēxguma chi aixcūma yixĩgu i ngēma nagu naxĩnũēxũ i duũxũgũ, rũ chi narũmemaē nixĩ na yexeraācũ chixexũ naxũgũxũ na yexeraācũ mexũ na ínguxuchixũcax. Rũ dũcax, Pa Chaueneēgũx, nangēxma i chixexũ i duũxũgũ i choxũ ūgagũmarexũ i nũxũ ixugũexũ na ngēma yĩxũ i chorũ nguxēētaē i duũxũgũxũ namaā changũxēēxũ. Natũrũ ngēma duũxũgũ i ngēma ñagũxũ rũ nagagu tátama napoxcue.

Guxāma i yixema rũ tipecaduāxgũ

⁹¿Rũ ñuxācũ nixĩ i ñuxmax? ¿Pexcax rũ yixema i Yudũgũ rũ togũ i duũxũgũarũ yexera Tupanapexewa imexũ? Pemaā nũxũ chixu rũ tama ngēmaācũ nixĩ. Erũ guxũma i duũxũgũ i Yudũgũ iixĩgũxũ rũ guxũma i duũxũgũ i tama Yudũgũ iixĩgũxũ, rũ pecadutũwātama nangēxmagũ. ¹⁰Erũ Tupanaārũ ore i ūmatũxũwa rũ ñanagũrũ:

“Rü tataxuma ya texé ya aixcūma
 Tupanapexewa mexē, rü bai ya
 wūxie. ¹¹Rü tataxuma ya texé
 ya aixcūma nüxū cuáxe i
 Tupanaärü ore na ñuxácü
 nanaxwaxexū na naxcax
 imaxēxū. Rü tataxuma ya texé
 ya aixcūma Tupanacax dauxe.
¹²Rü guxāma ítatüe, rü guxāma
 itayarítauxe rü chixexū taxügü
 i Tupanapexewa. Rü tataxuma
 ya texé ya aixcūma mexū
 üechaxe, rü bai ya wūxie. ¹³Rü
 tūmaāx rü wūxi i yuetamaxū i
 ingenaxūrū nixī erü ngēma
 ítanaxūxēē i nagúxūraūxū i
 dexa i chixexū. Rü tūmaärü
 conūmaā rü poraācü tidorae.
 Rü ngēma tūmaärü dexa rü
 ñoma āxtapegupütachatarū
 nixī erü togūxū nachixexēē.
¹⁴Rü chixexū i ore i
 duūxūgūāēwa
 ngúxūmaāxícatama tidexagü.
¹⁵Rü ítamemare na duūxēxū
 timáxū. ¹⁶Rü ngextá ítaxīxūwa
 rü togūxū tachixexēē rü
 tanangechaūxēē rü chixexūgu
 tanayixēē. ¹⁷Rü tama nüxū
 tacuax na ñuxácü togü i
 duūxūgūxū tangechaūgūxū rü
 meā natanüwa tamaxēxū. ¹⁸Rü
 tama nüxū tacuáxchañ na
 Tupanaxū tamuñēxū”,

ñanagürü i ngēma ore i ümatüxūwa.

¹⁹Rü nüxū tacuax ga Tupana rü
 Yudfugūna nanaxā ga norü mugü na
 naxauregüāxūcax rü tama nügü
 ínatagūxūcax. Natürü taxúema aixcūma
 naga taxīnū i ngēma mugü. Rü

ngēmacax taxucürüwa texé
 Tupanapexewa tügüétüwa tachogü i
 ngēxguma Tupana tüxū icagügu i
 tūmaärü pecaduchiga. ²⁰Rü ñuxma na
 taxúema aixcūma naga ínūēxū i ngēma
 mugü, rü ngēmacax taxucürüwama texé
 tügü tixu na ngēma mugü
 taxaurexūgagu Tupanapexewa tamexū.
 Erü ngēma mugü tüxū nüxū cuaxēēxū
 nixī na poraācü ipecaduāxgūxū.

**Tórü ôgagu nixī i Tupana
 tüxna naxāxū i maxū**

²¹⁻²²Rü ñuxma na taxucürüwama
 Tupanapexewa tüxū yamexēēxū i
 ngēma mugü, rü ngēmacax ya Tupana
 rü tüxū nüxū nacuaxēē na ñuxácü yīxū
 i tüxū yamexēēxū na napexewa
 imexūcax. Rü pemaā nüxū chixu rü
 Ngechuchu ya Cristuaxū na
 yaxōgūxūgagu nixī i tüxū yamexēēxū ya
 Tupana na aixcūma napexewa
 imexūcax. Rü yema mugü ga Moiché
 ümatüxū rü yema ore ga nuxcūmaūgūxū
 ga orearü uruūgü ümatüxū rü tüxū nüxū
 nacuaxēē i ngēma. Rü yema mexū ga
 Tupana taxcax üxū ga yexguma núma
 namuāgu ga Nane na tórü pecadu
 naxütanüxūcax, rü guxū i duūxūgü i
 yaxōgūxūcax nixī, erü Tupanapexewa rü
 nawūxigu i guxūma i ngēma duūxūgü.
²³Rü guxāma tipecaduāxgü rü nüxna
 tayaxūgugü ya Tupana ya tüxū
 maxēxēēcü. ²⁴Natürü ga Tupana rü
 poraācü tamaā namecūma rü yemacax
 tüxū nangetanüācūma tüxū nimexēēgü
 na napexewa imexūcax. Rü ñuxma rü
 tüxū nangēxma i maxū i taguma gúxū,
 yerü Ngechuchu ya Cristu rü marü tüxū
 nanaxütanü ga tórü pecadugü. ²⁵⁻²⁶Rü

Tupana rü aixcūma núma nanamu ga Cristu na nayuxūcax rü yemaācü tórü pecadu naxūtanūxūcax na Tupana tūxū nūxū ngechaūxūcax i ngēxguma aixcūma Cristuaxū yaxōgūgu. Rü yemaācü nanaxū ga Tupana na tūxū nūxū nadauxēēxūcax na ñuxācü nūma nūgūcax tūxū yamexēēxū na aixcūma napexewa imexūcax. Rü nuxcūma ga Tupana rü yaxna namaā naxīnū ga duūxūgū ga yexguma chixexū naxūegu, rü tama paxa nanapoxcue. Rü ñuxma rü ta tūxū nanawex na ñuxācü aixcūma namexū i ngēma nūma naxūxū erü tūxū ínanapi i tórü pecadugū. Rü ngēmaācü tūxū nūxū nadauxēē na ñuxma rü ta aixcūmacü yīxū i ngēxguma tūxū yaxuxgu na napexewa marū timexū ya guxāma ya yíxema Ngechuchuaxū yaxōgūxe. ²⁷Rü ngēmacax i ñuxma rü taxucūrūwama yigū ticuaxūūgū rü nūxū tixu na yixematama yigū imexēēgūxū i napexewa. Erü taxucūrūwama texé tūgū tamexēē i Tupanapexewa. Rü tama ngēma na naxaurexūcax i ngēma mugū nixī i imexū, rü tama ngēma na mexū ixūgūxūcax nixī i imexū. Natürü Tupanapexewa time i ñuxma, erü Cristuaxū tayaxōgū. ²⁸Rü yixema nūxū tacuax rü ngēxguma Cristuaxū yaxōgūgu nixī i Tupanapexewa imexū, rü tama ngēma mugū na ixauregūxūcax nixī i napexewa imexū. ²⁹¿Exna pexcax rü Tupana rü Yudfugüarü Tupanaxīcatama yīxū? ¿Rü tama exna i ngēma togū i duūxūgüarü Tupana rü ta yīxū? Ngēmaācüx, ngēma togū i duūxūgū i tama Yudfugū ixīgūxūārü Tupana ta nixī. ³⁰Rü nūxū tacuaxgū na nangēxmaxū ya wūxitama ya Tanatū ya

Tupana. Rü guxūma i duūxūgū i Cristuaxū yaxōgūxū, rü nūma ya Tupana rü nayamexēē na napexewa yamexūcax. Rü ngēmaācü i nūma ya Tupana rü Yudfugūxū nimexēē i ngēxguma yaxōgūāgu. Rü ngēxgumarūū ta nayamexēē i guxūma i togū i duūxūgū i ngēxguma Cristuaxū yaxōgūāgu. ³¹Rü ñuxma na Cristuaxū yaxōgūxū, rü bexmana nagu perūxīnūē na ngēmaācü iyanaxoxēēxū i ngēma mugū. Natürü tama ngēmaācü nixī. Erü ñuxma na Cristuaxū yaxōgūxū rü aixcūma tayanguxēē i ngēma Tupana tūxū muxū.

Abráū rü Tupanaāxū nayaxō rü yemacax Tupana nūxū nixu na namexū

4 ¹¿Rü ñuxma rü ñuxū ñagūxū tá i nachiga ga nuxcūmaūcü ga tórü oxī ga Abráū? ¿Rü ñuxācü nixī ga nūxū naxūpetūxū ga Tupanapexewa? ¿Rü tūxcūū yīxū ga Tupana nūxū ixuxū ga Abráū rü mecū na yīxū? ²⁻³Rü dūcax, yexguma chi wūxi ga norū puracū ga mexūcax Tupanapexewa namexgu ga Abráū, rü yexguma chi waxi nixī ga nūxū nayexmaxū ga tacūcax nūgū na yacuaxūūxū. Natürü taxucaxma Tupanapexewa nūgū nicuaxūū ga Abráū, erü Tupanaārū ore i ūmatūxūwa rü ñanagürü:

“Abráū rü Tupanaāxū nayaxō, rü yemacax Tupana nanayaxu rü nūxū nixu na namexū”, ñanagürü i ngēma ore. ⁴Rü ngēxguma texé wūxi i puracū ūxgu rü tūxū naxūtanūgu rü woetama tūmaārü natanū nixī rü tama āmare nixī i ngēma. ⁵Natürü tama ngēmaācü nixī i

ngëxguma Tupanaāxū yaxōxgu. Erü ngëxguma yaxōxgu, rü tama tacü rü puracü i mexūcax nixi i Tupanapexewa imexū, natürü Tupanapexewa time erü tayaxō. Rü ngëmaācü Tupana tüxū nayaxu ya yíxema yaxōxē woo taxuūma i tacü rü puracü i mexū taxūxgu na ngëmacax Tupana tüxū rüngūxēxū.

⁶Rü nuxcūmaūcü ga āëxgacü ga Dabí rü ta tūmachiga nidexa ga guxema duūxē ga yaxōxē. Rü nüxū nixu ga na tataāëxū ga guxema duūxē yerü Tupanapexewa tame, woo tama tacü rü mexū taxūxgu na yemaācü Tupanapexewa tamexūcax.

⁷Rü nūma ga Dabí rü ñanagürü:

“Rü tataāëgü ya yíxema duūxëgü ya Tupana tūmaärü chixexūgūxū ngechaūxē rü tūmaärü pecadugūxū iyanangūmaxē.

⁸Rü tataāë ya yíxema duūxē ya Tupana tama tüxū nagu naxñūxē i tūmaärü pecadu”, ñanagürü ga Dabí. ⁹Rü dücax, çpexcax rü ngëma taāë rü ngëma duūxūgü i Yudfugü ixīgūxūcaxicatama yīxū, rü exna ngëma togü i duūxūgūcax ta yīxū? Dücax, rü marü pemaā nüxū tixu rü Tupanapexewa name ga Abráü yerü nayaxō. Rü yemacax Tupana nanayaxu. ¹⁰¿Natürü ñuxgu nixi ga nayauxāxū? ¿Exna marü

ínawiechaxmüpechiraūguwena, rü exna naxūpa ga na ínawiechaxmüpechiraūxū? Rü pemaā nüxū chixu rü naxūpa nixi ga na Tupana nayaxuxū ga Abráü. ¹¹Rü Tupana nayaxuxguwena nixi ga ínawiechaxmüpechiraūxū ga Abráü. Rü yema nixi ga norü cuaxruū ga nawa nüxū nacuāxū na aixcūma Tupana marü

nayaxuxū rü nüxū nadauxū na namexū yerü nüxū nayaxō. Rü ngëmacax i ñuxma ya Abráü rü tūmanatü yīxū ya guxāma ya yíxema yaxōgūxe woo tama ítawiechaxmüpechiraūgūgu. Rü ngëmaācü ya Tupana rü tüxū nayaxu ya guxāma ya yíxema yaxōgūxe, rü tüxū nadau na timexū erü tayaxōgü. ¹²Rü ngëxgumarüü ta ya Abráü rü tūmanatü nixi ya guxāma ya yíxema íwiechaxmüpechiraūgūxe rü Abráü rü yaxōgūxe. Natürü tama ngëma na tūgü ítawiechaxmüpechiraūgūxūcax nixi i tūmanatü yīxū. Natürü tūmanatü nixi erü tayaxōgü yexgumarüü ga na yaxōxū ga nūma ga tanatü ga Abráü naxūpa ga na ínawiechaxmüpechiraūxū.

**Abráü rü Tupanaāxū nayaxō rü yemacax
Tupana nayanguxēë ga norü uneta ga
Abráümaā nüxū yaxuxū**

¹³Rü Tupana rü Abráümaā inaxuneta na nūma ya Abráü rü guxūma i naxrüü yaxōgūxū rü tá na nayauxgūāxū i ñoma i naāne na noxrü yīxūcax. Natürü tama yema na mugü naxaurexūcax nixi ga Tupana yemaācü Abráümaā ixunetaxū. Natürü yemaācü namaā inaxuneta yerü Abráü nayaxō, rü yemacax Tupanapexewa name. ¹⁴Natürü ngëxguma chi ngëma duūxūgü i mugü auregūxūcaxicatama yixūgu i ngëma Tupanaärü uneta, rü natūcaxmamare chi nixi i ngëma na yaxōgūxū, rü chi ngëma Tupanaärü uneta rü taxuwama name. ¹⁵Nüxū tacuax rü ngëma mugü ga Moiché ümatixū rü poxcuwa tüxū naga erü taxúema aixcūma meā tayanguxēë. Natürü yexguma chi

natauxguma ga yema mugü rü tataxu chima na texe chixri yanguxēēxū. ¹⁶Rü yexguma Tupana Abráũmaã ixunetagu na nüxū tá nangũxēēxū, rü Abráũärü ôgagu nixi ga namaã inaxunetaxū. Rü ngēmacax i guxāma i yixema na Abráũrüü yaxôgũxū rü taxcax ta nixi ga yema Tupanaärü uneta ga Abráũmaã nüxū yaxuxū. Rü ngēmawa nüxū tacuax rü tama yixema mugü auregüxecañicatama nixi i ngēma Tupanaärü uneta, natürü guxāma ya yixema Abráũrüü Tupanaãxū yaxôgũxēcax ta nixi. Rü ñuxma rü guxāma i yixema na Abráũrüü meã yaxôgũxū rü Abráũxácügu tixigü rü nūma rü tanatü nixi i Tupanapexewa yerü nüxira nayaxô. ¹⁷Rü Tupanaärü ore i ümatixũwa rü Abráũchigaxū nixu rü ñanagürü:

“Rü muxūma i duũxũgünatü tá cuxū chixxēē”,

ñanagürü. Rü Abráũ rü Tupanaãxū nayaxô, rü yemacax Tupana nayanguxēē ga norü uneta ga namaã nüxū yaxuxū. Rü yima Tupana nixi ya wena namaxēxēcū i yuexū. Rü yimatama nixi ya naxücü i ngēma woo ñuxma taxuxū. ¹⁸Rü nūma ga Abráũ rü aixcūma nayaxô ga yexguma Tupana nüxū ñaxgu:

“Rü tá namuxūchi i cutaagü”, ñaxgu. Rü woo ga Abráũ ga marü yaguãxūchichirex na yĩxū rü na nangexacūxū, natürü nayaxôoma ga yema Tupanaärü uneta rü meã ínananguxēē na wüxi ga nane tá nüxū yexmaxū. Rü yemaäcū ningu na muxūma i duũxũgünatü yĩxū, yema Tupana namaã nüxū ixuxürü. ¹⁹Rü Abráũ rü wixguxuchi 100 ga taunecü nüxū nayexma ga yexguma. Natürü tama inayarümaãchi ga na yaxôoxū woo

nüxū na nacuáxū ga paxa tá na nayuxēü ga nūma rü namax ga Chara rü marü poraäcū nangupetüärü taunecüãxgũxū ga na naxāxácügũxūcax. ²⁰Rü yemaäcū ga Abráũ rü nayaxôoma na nüxū tá nayexmaxū ga wüxi ga nane yema Tupana namaã ixunetaxürü. Rü tama nagu narüxĩnū na Tupana ngürüächi nawomüxēēxū. Natürü yexeraäcū Tupanaãxū nayaxôoma, rü nüxū nicuaxū. ²¹Rü aixcūmaxūchi nayaxô na naporaxū ya Tupana na yanguxēēãxūcax i guxūma i ngēma norü uneta. ²²Rü yemacax ga Tupana rü nüxū nixu na napexewa namexū ga Abráũ. Yerü Tupana nüxū nadau ga ñuxäcū aixcūma nüxū na yaxôoxū. ²³Rü tama Abráũchigaxicatama nixi ga naxūmatixū ga Tupanaärü ore ga ñaxū:

“Rü Tupana rü nüxū nixu na napexewa namexū ga Abráũ, yerü nüxū nadau ga ñuxäcū aixcūma nüxū na yaxôoxū”,

ñaxū. ²⁴Natürü guxāma i yixema na yaxôgũxūchiga ta nixi i ngēma ore. Erü Tupana rü tórü ôgagu tüxū nade na napexewa imexū i yixema i nüxū na yaxôgũxū ya yima yuwa tórü Cori ya Ngechuchuxū írüdaxēēcū. ²⁵Rü Ngechuchuxū nixi ga namuxū ga Tupana na tórü pecaducax nayuxūcax. Rü ñuxūchi nūma ga Tupana rü wenaxärü Ngechuchuxū ínarüdaxēē na nagagu imexūcax i Tupanapexewa.

Ñuxma rü Tupanapexewa tame erü Cristuaxū tayaxôgü

5 ¹Rü ñuxma rü Tupanapexewa time erü tayaxôgü. Rü ngēmacax marü tama Tupanamaã taxuwanüãxgü i

ñuxmax, erü tórü Cori ya Ngechuchu ya Cristu rü marü tamaã nanangüxmüxëẽ ya Tupana. ²Rü Cristugagu nixĩ na tamaã namecūmaxũ ya Tupana i ñuxmax erü tayaxögü. Rü nüxũ tacuax rü guxũgutáma tamaã namecūma. Rü tataãëgü erü nüxũ tacuax na tüxũ tá nangëxmaxũ i tachica i mexũ i Tupanaxütawa. ³Rü ngëxgumarüũ ta tataãëgü i woo ngúxũ ingegügu. Erü nüxũ tacuax rü ngëma ngúxũ rü tüxũ narüngüxëẽ na yexeraäcü iporaexũ rü yaxna namaã ixĩnüëxũcax. ⁴Rü ngëxguma yaxna namaã ixĩnüëgu rü Tupana rü tamaã nataãë. Rü ngëma na tamaã nataãëxũ rü ngëmacax meã ítananguxëẽ na tüxũ tá nangëxmaxũ i tachica i mexũ i Tupanaxütawa. ⁵Rü ñuxma na ínananguxëẽxũ na tüxũ tá nangëxmaxũ i tachica i Tupanaxütawa, rü ngëmacax taxucaxma tangechaũgü. Erü Tupana rü poraäcü tüxũ nangechaũ. Rü ngëma Naãë i Üünexũ i tüxna namuxũ nixĩ i tüxũ nüxũ cuaxëëxũ i ngëma. ⁶Rü yexguma taxucürüwama yigütama imaxëëëgu, rü nawa nangu na Tupana yanguxëëxũ ga yema norü uneta. Rü yexguma nixĩ ga ñoma ga nañewa namuãxũ ga Cristu na pecaduãxgüxũcax nayuxũcax. ⁷Rü tama natauxcha na wüxie rü to i duũxũcax tayuxũ, woo wüxi i duũxũ i mexũcax yixĩgu. Rü woo tangëxmagu ya texé ya naxcax yuchaũchiréxe i wüxi i duũxũ i aixcūma mexëchixũ, natürü tama tüxũ natauxcha i ngëma. ⁸Natürü Tupana tüxũ nüxũ nadauxëẽ na ñuxäcü tüxũ nangechaũxũ yerü yexguma ipecaduãxgügu nixĩ ga taxcax nayuxũ ga Cristu. ⁹Rü ñuxma rü Tupanapexewa

time yerü taxcax nayu ga Cristu. Rü ngëmacax meãma nüxũ tacuax rü nūma rü aixcūma tá tüxũ ínanguxũxëẽ na tama tüxũ napoxcuexũcax ya Tupana. ¹⁰Rü yexguma norü uwanügü ixĩgügu, rü nūmatama ga Tupana rü nügūmaã tüxũ narüngüxmüxëẽ ga yexguma nayuxgu ga Nane. Rü ñuxma na marü namaã irüngüxmüxëẽ, rü yexeraäcü nüxũ tacuax na tüxũ nangëxmaxũ i maxũ i taguma gúxũ nagagu na namaxũxũ i nūmax. ¹¹Rü tama ngëxĩcatama nixĩ. Natürü i ñuxma rü tórü Cori ya Ngechuchu ya Cristugagu rü Tupanamaã tataãëgü, yerü Cristugagu nixĩ ga Tupana ga tamaã nangüxmüxũ.

Adáũchiga rü Cristuchiga

¹²Rü wüxitama ga yatü ga Adáũgagu nixĩ ga ñoma ga nañewa nangóxũ ga pecadu. Rü pecadugagu nixĩ ga inaxügüxũ na nayuxũ ga duũxũgü. Rü yemaäcü guxũma ga duũxũgüwa naxië na nayuxũ, yerü guxũma nipecaduãx. ¹³Rü naxũpa na Tupana Moĩchéna naxãxũ ga yema mugü ga naxūmatüxũ, rü duũxũgü rü chixexũ naxügüëcha, rü yemacax nayue. Natürü yema mugü rü tauta nayexma ga yexguma, rü yemacax taxucürüwa texé nüxũ tixu ga yema duũxũgü ga na chixri naga naxĩnüëxũ ga yema mugü. ¹⁴Rü yema duũxũgü ga Adáũwena buexũ rü tama Adáũrüũ nanangõx ga yema orix ga Tupana nüxna chuxuxũ. Natürü chixexũ naxügü, rü yemacax nayue. Rü yemaäcü nixĩ ñuxmata Tupana Moĩchéna naxã ga yema mugü ga naxūmatüxũ. Rü Adáũwa inaxügü na nayuxũ ga

duñxũgũ, natürü Cristuwa inaxũgũ na nayaxuxũ i maxũ i taguma gũxũ.

¹⁵Natürü yema chixexũ ga Adáũ üxũ rü taxuacü nagu tanangu i ngẽma ãmare ga Tupana tũxna ãxũ, erü tama namaã nawũxigu. Rü aixcũma nixĩ ga wũxi ga yatũarü chixexũgagu na nayuxexũ i guxũma i duñxũgũ. Natürü tama yemaãcũ tamaã nanaxü ga Tupana. Yerü nũma rü tũxũ nangetanũãcũma núma nanamu ga Nane ya Ngechuchu ya Cristu na tórü pecaducax nayuxũcax. Rü yemaãcũ guma Cristugagu Tupana nanamaxẽxẽe i muxũma i duñxũgũ.

¹⁶Rü yema pecadu ga Adáũ üxũ rü taxuacũma nagu tanangu ga yema ãmare ga Tupana tũxna ãxũ. Yerü wũxitama ga Adáũarü pecadugagu, rü Tupana nũxũ nixu rü tá nayu naxcax ga yema. Natürü Ngechuchu ya Cristugagu rü Tupana nũxũ nixu na napexewa imexũ rü nũxna ñinguxũxũ i guxũma i tórü pecadugũ. ¹⁷Rü guxũma i duñxũgũ nayue yerü wũxitama ga yatü ga Adáũ rü pecadu naxü. Natürü tama yemaãcũ tamaã nanaxü ga Tupana, yerü ga nũma rü poraãcũ tamaã namecũma rü tũxũ nangetanũãcũma tũxũ narñingũxẽe. Rü ngẽmacax i ñuxma rü guxũma i ngẽma duñxũgũ i Tupana nũxũ ixuxũ na napexewa yamexũ, rü nũmatama ya Tupana rü Nane ya Ngechuchu ya Cristugagu nanamaxẽxẽe na namaã wũxigu ãẽxgacũgũ yixĩgũxũcax. ¹⁸Rü yema Adáũarü chixexũ rü poxcuwa nanagagũ ga guxũma ga duñxũgũ. Natürü yema mexũ ga Ngechuchu ya Cristu üxũ rü pecaduwa ínanguxũxẽe i guxũma i duñxũgũ i yaxõgũxũ, rü nũxna nanaxã i maxũ i taguma gũxũ.

¹⁹Rü guma nũxĩraũcũ ga yatü ga Adáũ rü tama Tupanaga naxĩnũ. Rü yemaãcũ wũxitama ga yatũgagu rü muxũma ga duñxũgũ rü nipecaduãx. Natürü ínangu ga guma yatü ga Ngechuchu, rü meã Tupanaga naxĩnũ. Rü gumagagu rü muxũma i duñxũgũ rü tá nime i Tupanapexewa. ²⁰Rü Tupana rü Moĩchéna nanaxã ga norü mugũ na duñxũgũxũ nũxũ nacuxẽẽxũcax na ñuxãcũ poraãcũ pecadu naxũgũxũ. Natürü yexguma yexeraãcũ pecadu naxũgũgũ ga duñxũgũ, rü yexeraãcũ Tupanaãxũ nangechaũtũmũgũ. ²¹Rü ñuxma woo pecadugagu na iyuxexũ, natürü Tupanaãxũ tangechaũtũmũgũ i guxũguma. Rü ngẽmaãcũ pecaduwa tũxũ ínanguxũxẽe na napexewa imexũcax rü tórü Cori ya Ngechuchu ya Cristugagu tũxũ nangẽxmaxũcax i maxũ i taguma gũxũ.

Ñuxma rü tama pecadu ixũgũxũcax nixĩ i imaxẽxũ, natürü Cristucax nixĩ i imaxẽxũ

6 ¹Rü ñuxma na Tupanaãxũ ingechaũtũmũgũxũ, ¿rü ñuxãcũ tá imaxẽxũ i ñuxmax? ¿Rü pexcax rü namexũ na pecadu ixũgũechaxũ na yexeraãcũ Tupanaãxũ ingechaũtũmũgũxũcax? ²Rü ducax, tama ngẽmaãcũ nixĩ. Erü ñuxma pecaduchaxwa rü ñoma iyuxẽrũ tixĩgũ, erü marü tama naga taxĩnũe. Rü ngẽmacax tama name i yeũcürü pecadu taxũgũecha. ³¿Tama exna nũxũ pecuax na ñacũcax yĩxũ na ñibaiũxũ? Rü ítabaiũ na ngẽmaãcũ duñxũgũxũ nawéxũcax na aixcũma Ngechuchu ya Cristuarü duñxũgũ na ixĩgũxũ. Rü yexguma ñibaiũgũ, rü nũma nayuxũrũ yexma

nayu ga tacūma ga nuxcūmaũxũ. ⁴Rü yexguma íbaiũgu, rü Cristu yuxũrũ yexma nayu ga tacūma ga nuxcūmaũxũ, rü Cristu itáxũrũ inatax ga yema tacūma ga nuxcūmaũxũ. Rü yemaäcü naxüpetü na wena imaxẽxũcax rü tũxũ nangẽxmaxũcax i maxũ i ngexwacaxũxũ, yexgumarũ ga Ngechuchu na yuwa írudaxũ rü wena namaxũxũ ga yexguma Nanatũ ga Tupana norü poramaã ínadaxẽegu. ⁵Rü ñuxma na Cristumaã wũxigu nayuxũ ga tacūma ga nuxcūmaũxũ, rü nüxũ tacuax na aixcūma Cristumaã tũxũ nangẽxmaxũ i maxũ i ngexwacaxũxũ. ⁶Rü nüxũ tacuax rü yema tórü maxũ ga nuxcūmaũxũ rü Cristumaã wũxigu curuchagu nayu na yexma yanaxoxũcax ga yema tacūma ga chixexũ. Rü ñuxma rü tama pecadutũuwa tangẽxmagü, rü ngẽmacax marü tama naga taxĩnüẽ. ⁷Erü yíxema yíxe rü marü tama pecadutũuwa tangẽxma na yeũcüri pecadu taxüechaxũcax. ⁸Rü ñuxma na Cristumaã nayuxũ ga tórü maxũ ga nuxcūmaũxũ, rü nüxũ tacuax na Cristurũ tũxũ nangẽxmaxũ i maxũ i ngexwacaxũxũ. ⁹Rü nüxũ tacuax rü ñuxma na yuwa ínadaxũ ya Cristu, rü tagutáma wena nayu. Yerü nüma rü marü yuxũ narüyexera. ¹⁰Rü yexguma nayuxgu ga Cristu rü pecaducax nixĩ ga nayuxũ, rü noxtacūma yexma wũxicana ningutanũ ga guxũma ga duũxũgüarü pecadugü. Natürü ñuxma na namaxũxũ, rü Tupanacax nixĩ i namaxũxũ na Tupanaärü ngúchaũ naxũxũcax. ¹¹Rü ngẽxgumarũ ta i pema rü name nixĩ i pegügu perüxĩnüẽ na marü peyuexũ pecaduchaxwa rü Tupanacax pemaxẽxũ,

erü Ngechuchu ya Cristuarü duũxũgü pixĩgü. ¹²Rü ngẽmacax rü tama name i pecadutũuwa pegü pengẽxmagüxẽẽ na pemaã inacuáxũcax. Rü tama name i penaxũchica i pecadu na pexeneärü ngúchaũgü i chixexũ pexũ naxũxẽexũcax. ¹³Rü tama name i pecaduna penaxãgü i pexene na ngẽmamaã chixexũ pexiugũxũcax. Rü name nixĩ i Tupanana pegü pexãgü, erü ñoma duũxũgü i yuexũ rü wena maxẽxũrũ pixĩgü. Rü ngẽmacax name nixĩ i Tupanana penaxãgü i pexene na ngẽmamaã mexũ pexiugũxũcax. ¹⁴Rü ñuxma rü tãütáma pecadutũuwa pengẽxmagü na pemaã inacuáxũcax. Rü yexguma yema mugü ga Moíché umatixũwe perüxĩngu, rü pemaã inacuax ga pecadu. Natürü i ñuxma rü Cristugagu Tupana pemaã namecūma, rü nüma nixĩ i pemaã inacuáxũ i ñuxmax.

**Ngẽxguma wüxi i corimẽxewa
yigü ingẽxmagüxẽegu, rü ngẽmaga
nixĩ i ixĩnüexũ**

¹⁵Rü ñuxma na tama yema Moíché umatixũ ga mugütũuwa ingẽxmagüxũ, rü ñuxma na Tupana rü Cristugagu tamaã mecūmaxũ, ¿rü ñuxãcü tá imaxẽxũ? ¿Rü pexcax namexũ na yeũcüri pecadu ixügüechaxũ? Rü dũcax, tama name na ngẽmaäcü imaxẽxũ. ¹⁶Rü pema nüxũ pecuax rü ngẽxguma wüxi i corimẽxewa pegü pengẽxmagüxẽegu na naga pexĩnüexũcax rü ngẽma tá nixĩ i perü cori ixĩxũ, rü pema rü norü duũxũgü tá pixĩgü i ngẽma cori i naga pexĩnüexũ. Rü ñuxma rü pema tá nüxũ pedaugü

ngoxi ngēxūrūxū perū me yixĩ na ngēmaga pexĩnūēxūcax. Rū ngēxguma pecadu i yuwa tūxū gagūxū perū me yixĩgu, rū ngēma tá nixĩ i pemaā icuáxū. Rū ngēxguma perū me yixĩgu na Tupanaga na pexĩnūēxū, rū yimaga tá pexĩnūē na napexewa pimexūcax.

¹⁷Natūrū Tupanana moxē chaxā, yerū woo pecaduga na pexĩnūēchirēxū, natūrū i ñuxma rū aixcūma naga pexĩnūē i ngēma nguxēētae i marū peyaxuxū i Cristuchiga. ¹⁸Rū ñuxma rū Tupanaārū duūxūgū pixĩgū erū nūma rū chixexūna pexū ĩnanguxūxēē na tama pecadu pexūgūechaxūcax. Rū ngēmaācū pexū narūngūxēē na napexewa

pimexūcax rū meā naxcax pemaxēxūcax. ¹⁹Rū ñoma i naānecūāx i duūxūgūmaā chidexarūū nixĩ i tauxchaxū i oremaā pemaā chidexaxū i ñuxmax, erū pema rū woetama taguma nūxū pexĩnūē i ñaā ore, rū ngūrūāchi tāūtāma nūxū pecuax i tacūchiga na yīxū i ngēma pemaā nūxū chixuxū. Rū dūcax, rū nuxcūma rū ipenaxā ga pexene na namaā penaxūgūxūcax ga nagúxūraūxū ga chixexū. Natūrū i ñuxma rū name nixĩ i Tupanana pegū pexā na aixcūma napexewa pexūūnegūxūcax rū naxcaxicatama pemaxēxūcax. ²⁰Rū yexguma pecadutūūwa peyexmagūgu, rū taxucūrūwama Tupanapexewa mexū pexūgū ga yexguma. ²¹¿Natūrū tacūwa pexū namexū ga yema chixexū i ñuxma rū wūxi i āne pexna āxū? Yerū yema chixexū rū yuwamare pexū nagagū, rū tama i maxūwa. ²²Natūrū marū tama pecadutūūwa pengēxmagū i ñuxmax, erū marū nūxna ĩpengūū rū marū

Tupanaārū duūxūgū pixĩgū. Rū ngēma waxi nixĩ i poraācū pexū mexū erū ngēmagagu penayaxu i maxū i Tupanapexewa ūūnexū rū ngēmawena tá penayaxu i maxū i taguma gúxū.

²³Rū ngēma natanū na pecadu ixūxū, rū yu nixĩ. Natūrū yíxema tórū Cori ya Ngechuchuaxū yaxōgūxe, rū Tupana tūxna nanaxāmare i maxū i taguma gúxū.

Wūxi i ngecū rū ngēxguma nayutegu rū marū tama ngītemexēwa ingēxma. Rū ñuxma na taxcax nayuxū ya Cristu, rū marū tama yema Moiché ūmatūxū ga mugūtūūwa tangēxmagū

7 ¹Pa Chaueneēgūx, rū pema na nagu pexĩxū i ngēma mugū, rū nūxū pecuax rū ngēxguma tamaūxguxicatama nixĩ na ngēma mugūtūūwa tangēxmaxū ya wūxichigū ya duūxē. ²Rū dūcax, rū wūxi i ngecū i āteci rū ngītemexēwa ingēxma ega namaxyane ya ngīte, erū ngēma ñanagūrū i ore i mugū. Natūrū ngēxguma nayuxgu ya ngīte, rū marū tama ngītemexēwa ingēxma. Rū yema mugū ga ngītemexēwa ngīxū yexmaxēēxū ga noxri rū marū tama ngīmaā inacuax. ³Rū ngēmaācū i ngēxguma namaxyane ya ngīte rū to i yatūmaā inapexgu, rū pecadu ixū. Natūrū ngēxguma marū nayuxgu ya ngīte, rū marū nūxna ĩnguxuchi i ngēma mugū ga ngītemexēwa ngīxū yexmaxēēxū ga noxrix. Rū ngēxguma wenaxārū naxātegu rū taxūūma i chixexū ixū. ⁴Rū ngēxgumarūū ta i pemax, Pa Chaueneēgūx, rū marū tama yema Moiché ūmatūxū ga mugūtūūwa pengēxmagū yerū nūma ga Cristu rū

pexcax nayu. Rū ngēmacax i ñuxma rū Cristu ga yuwa írudaciärü pixīgü. Rū ngēmaäcü nanaxü ya Tupana na naxcax imaxēxūcax, rū norü ngúchañ ixügüxūcax. ⁵Rū yexguma nuxcūmañxū ga tacūmawe rūxīgü rū poraäcü tanaxü ga taxūneärü ngúchañgü woo yema mugü tūxna na nachuxuxū ga yema. Natürü yexguma nūxū icuaxgu na nachuxuxū ga yema pecadu ga ixūxū, rū yexeraäcü tanaxūchañ. Rū yemaäcü ga yema tórü pecadugü rū yuwa tūxū nagagü. ⁶Natürü i ñuxma rū marü tama ngēma mugütüüwa tangēxmagü, erü Tupana rū marü nūxna tūxū ínanguxūxēē. Rū ngēmacax i ñuxma rū ñoma duñxūgü i iyuexürü tixīgü i napexewa i ngēma mugü, erü marü tama tamañ inacuax. Rū ngēmacax tama nagu taxí i ngēma nuxcūma ümatūxū ga mugü, erü marü nūxna ítanguxū na Tupanaärü ngúchañ ixügüxūcax rū naxcax na imaxēxūcax namañ i tórü maxū i ngexwacaxūxū i Naäē i Üünexū tūxna āñū.

Ngēma pecadu i chowa ngēxmaxū rū chomañ inacuax

⁷¿Rū ñuxū ñagüxū tá i ñuxmax? ¿Rū pexcax rū yema mugü yīxū ga tūxū pecaduāxēxū? ¡Rū dūcax, tama name i ngēmaäcü nagu tarūxīñüē! Natürü yexguma chi yema mugü rū tama choxū nūxū nacuaxēēgu, rū tāū chima nūxū chacuax na pecadutüüwa chayexmaxū. Rū dūcax, rū yexguma chi yema mugü rū tāū chima choxū nūxū cuaxēēgu na wūxi i pecadu yīxū na toguāxärü ngēmaxūcax chiauxāchixū, rū tāū chima nūxū chacuax na pecadu yīxū i

ngēma. ⁸Natürü yexguma yema mugü choxū nguxēēgu na nachixexū na toguāxärü ngēmaxū choxū ngúchañxū, rū yexguma ga pecadu rū nayoxniē na yexeraäcü choxū na nangúchañxēēāxū. Rū ngēmaäcü nūxū tadau rū ngēxguma chi natauxgu i ngēma mugü, rū tāū chima nūxū tacuaxgü na ñuxācü wūxi i chixexūchixū na yīxū i ngēma pecadu. ⁹⁻¹⁰Rū noxri tauta yema mugūxū chacuaxgu, rū choma nagu charūxīñügu rū chame. Natürü yexguma yema mugūxū chacuaxgu, rū nūxū chicuaxāchi na chixexū chaxūxū rū ngēma chixexūcax rū tá na chayuxū. Rū yemaäcü ga yema mugü ga Tupana Moíchéna āñū na duñxūgüxū namaxēxēēxūcax, rū choxū nayuxēēāma. ¹¹Rū nūma ga pecadu rū nayoxniē namañ ga yema mugü. Yerü yexguma yema mugü choxū nguxēēgu na ñuxācü nachixexū ga yema pecadu, rū yexeraäcü choxū nangúchañ ga yema pecadu. Rū yemaäcü ga yema pecadu rū choxū nawomūxēē rū nayoxniē namañ ga yema mugü rū yuwa choxū naga. ¹²Natürü yema mugü rū aixcūma naxūüne i Tupanapexewa. Rū guxūma i ngēma Tupana tamañ nūxū ixuxū rū naxūüne rū aixcūma name rū tūxū narūngūxēē. ¹³¿Natürü ñuxācü nixí i ngēma i ñuxmax? ¿Exna pexcax rū yema mugü yīxū ga yuwa choxū gaxū? Rū dūcax, rū tama ngēmaäcü nixí. Erü ngēma pecadu nixí i Tupanaärü mugūmañ yoxniēxū na yuwa choxū nagaxūcax. Rū ngēmaäcü nūxū tacuax na ñuxācü poraäcü nachixexū i pecadu. Rū yexguma yema mugü choxū nguxēēgu na ñuxācü poraäcü nachixexū

ga yema pecadu, rü yexeraäcü choxŭ
nangúchaŭ ga yema chixexŭ rü
yexeraäcü chanaxüama ga pecadu.

¹⁴Nüxŭ tacuax i ngëma mugü rü
Tupanaäe i Üünexüwa ne naxü. Natürü
choma rü duüxümare chixŭ, rü
ngëmacax nixŭ i chomaä inacuáxŭ i
ngëma pecadu i chaxüxŭ. ¹⁵Rü tama
nüxŭ chacuax na tacü choxŭ üpetüxŭ
erü tama chanaxü i ngëma mexŭ i
chanaxwaxexŭ na chaxüxŭ, natürü
ngëma chixexŭ i tama chanaxwaxexŭ na
chaxüxŭ rü ngëmaäma nixŭ i chaxüxŭ.

¹⁶Natürü i ñuxma na chanaxüxŭ i
ngëma tama chanaxwaxechiréxŭ na
chaxüxŭ, rü ngëmawa nüxŭ chicuaxächi
na namexŭ i ngëma mugü. ¹⁷Rü
ngëmacax i ñuxma rü tama chauechama
nixŭ i chanaxüxŭ i ngëma chixexŭ.
Natürü ngëma pecadu i chowa
ngëxmaxŭ nixŭ i chomaä icuáxŭ, rü
ngëma nixŭ i chixexŭ choxŭ üxëxŭ.

¹⁸Rü choma nüxŭ chacuax rü wüxi i
pecaduáxŭ i duüxümare chixŭ, rü
ngëmacax chowa rü nataxuma i tacü i
mexŭ. Erü woo chanaxwaxe na mexŭ
chaxüxŭ, natürü tama chomaä nanguxŭ
na chanaxüxŭ. ¹⁹Erü ngëma mexŭ i
chanaxwaxexŭ na chaxüxŭ, rü tama
chanaxü. Natürü chanaxüama i ngëma
chixexŭ i tama chanaxwaxexŭ na
chanaxüxŭ. ²⁰Rü ngëxguma chi
chanaxüamagu i ngëma chixexŭ i tama
chanaxwaxexŭ na chaxüxŭ, rü meäma
nangox na tama chauechama
chanaxüxŭ. Natürü ngëma pecadu i
chowa ngëxmaxŭ nixŭ i chomaä icuáxŭ
rü chixexŭ choxŭ üxëxŭ. ²¹Rü
ngëmaäcü nüxŭ chadau i ñuxäcü na
chiixŭ. Rü ngëxguma mexŭ

chaxüxchaŭgu rü choxŭ natauxcha na
chixexŭäma chaxüxŭ. ²²Choma rü
chauäewa rü chorü me nixŭ i Tupanaärü
mugü, rü naga chaxínüchaŭ. ²³Natürü
ñaä chaxune i ñoma i naänecüäx
ixixüwa, rü nangëxma i tacü i tama
naxüxchaŭxŭ i ngëma chauäe
naxwaxexŭ. Rü ngëma pecadu i chowa
ngëxmaxŭ nixŭ i chomaä icuáxŭ rü
chixexŭ choxŭ üxëxŭ. ²⁴⁻²⁵Rü
ngëmaäcü i choma rü chauäewa
chayanguxëechaŭ i Tupanaärü mugü,
natürü ñoma i naänecüäx i chaxune rü
nanaxüxchaŭ i ngëma nanaxwaxexŭ i
pecadu. Rü taxucaxma chataäe i
chomax. ¿Rü texé tá nüxna choxŭ
ítanguxuchixëe i ñaä pecadu i chowa
ngëxmaxŭ rü yuwa choxŭ gaxchaŭxŭ?
Rü Tupanana moxë chaxä erü tórü Cori
ya Ngechuchu ya Cristu rü tá choxŭ
nüxna ínanguxuchixëe.

Ñuxäcü Tupanaäe i Üünexŭ naxwaxexŭäcüma meä tamaxe

8 ¹Rü ñuxma ya Tupana rü marü
taxucaxma nanapoxcue i ngëma
duüxügü i Ngechuchu ya Cristuarü
duüxügü ixigüxŭ. ²Erü Tupanaäe i
Üünexŭ i Ngechuchu ya Cristugagu tüxŭ
maxëxëxŭ, rü nüxna tüxŭ ínanguxüxëe
i pecadu na tama yuwa tüxŭ
nagagüxücax. ³Rü yema taxüneärü
ngúchaŭgü rü marü nüxŭ narüyexera ga
yema mugü ga Moiché ümatüxŭ. Rü
yemacax ga yema mugü rü taxucürüwa
mexŭ tüxŭ naxüxëe. Natürü nüma ga
Tupana rü marü nanaxü ga yema
taxucürüwa naxüxŭ ga yema mugü.
Yerü ga Tupana rü ñoma ga naänewa
nanamu ga Nanexüchi. Rü woo taxüne i

pecaduáxŭrũ nixĩ ga naxũne, natũrũ nũma ga Nane rũ taguma napecaduāx. Rũ nũma ga Nane rũ tórũ pecaduāx nayu, rũ yemaācũ inayanaxoxēē ga norũ pora ga yema pecadu ga taxũnewa yexmaxũ. ⁴Rũ yemaācũ nanaxũ ga Tupana na tũxũ na natauxchaxũcax na yanguxēēxũ i ngēma tũxũ namuxũ i ngēma mugũ. Erũ ñuxma rũ tama ñoma i taxũne naxwaxexũācũma tamaxē, natũrũ Tupanaāē i Üünexũ naxwaxexũācũma nixĩ i imaxēxũ. ⁵Rũ yĩxema tũmaxũne naxwaxexũācũma maxēxē, rũ naxcax tadaugũ i ngēma ñoma i naānecũāx naxwaxexũ. Natũrũ yĩxema Tupanaāē i Üünexũ naxwaxexũācũma maxēxē, rũ ngēma Tupanaāē i Üünexũ naxwaxexũ nixĩ i naxcax tadaugũxũ. ⁶Rũ yĩxema Tupanaāē i Üünexũ naxwaxexũcax daugũxe rũ tataāēgũ, rũ tá tũxũ nangēxma i tũmaārũ maxũ i taguma gúxũ. Natũrũ yĩxema tũmaxũne naxwaxexũcax daugũxe rũ ngēma rũ tá yuwa tũxũ nagagũ. ⁷Rũ yĩxema tũmaxũne naxwaxexũcax daugũxe rũ Tupanaārũ uwanũ tixĩgũ. Rũ tama Tupanaga taxĩnũēchaũ erũ taxucĩrũwama naga taxĩnũē. ⁸Rũ ngēmācax ya yĩxema tũmaxũneārũ ngúchaũwe rũxĩxē, rũ taxucĩrũwa Tupanaārũ ngúchaũ taxũgũ. ⁹Natũrũ ngēxguma aixcũma pewa nangēxmagu i Tupanaāē i Üünexũ rũ tama pexeneārũ ngúchaũ pexũ, natũrũ Naāē i Üünexũārũ ngúchaũ nixĩ i pexũxũ. Rũ yĩxema tama tũxũ nangēxmaxē i Tupanaāē i Üünexũ i Cristu tũxna āxũ, rũ tama Cristuarũ duũxũ tixĩ. ¹⁰Natũrũ ngēxguma pewa namaũxgu ya Cristu, rũ

woo pecadugagu tá nayuxgu i pexene, natũrũ peāē rũ namaxũ, erũ Tupana pexũ nadau na pimexũ. ¹¹Rũ ngēxguma pewa namaũxgu i Naāē ya yima Tupana ga Ngechuchu ya Cristuxũ írũdaxēēcũ, rũ nũmatátama ya yima Cristuxũ írũdaxēēcũ tá wena nanamaxēē i pexene i yuxwaxexũ, rũ Naāē i Üünexũ i pewa maxũxũ tá nixĩ i naxũxũ i ngēma. ¹²Rũ ngēmācax, Pa Chaueneēgũx, rũ tanaxwaxe i Tupanaārũ ngúchaũ taxũ, rũ tama tanaxwaxe i taxũne i pecaduáxũārũ ngúchaũ taxũ. ¹³Erũ ngēxguma chi pexeneārũ ngúchaũ pexũxgu rũ tá ipeyarũtauxe. Natũrũ ngēxguma Tupanaāē i Üünexũārũ ngũxēēmaā ipeyanaxoxēēgu i ngēma pexene üxchaũxũ, rũ aixcũma tá pexũ nangēxma i maxũ i taguma gúxũ. ¹⁴Erũ guxāma ya yĩxema Tupanaāē i Üünexũ tũmamaā icuāxe, rũ aixcũma Tupanaxācũgũ tixĩgũ. ¹⁵Noxri rũ Tupanaxũ pemuũē ga yexguma pepecaduāxgũgu, natũrũ i ñuxma rũ Tupanaxācũgũ pixĩgũ erũ Naāē i Üünexũ rũ naxācũgũxũ pexũ nixĩgũxēē. Rũ Naāē i Üünexũ i pema peyaxuxũ rũ pemaā namecũma rũ tama poxcumaā pexũ namuũxēē. Rũ ngēmatama Naāē i Üünexũ nixĩ i tũxũ rũngũxēēxũ na tama imuũēxũcax na Tupanana ingaicamagũxũ rũ:

“Pa Tonatũx”, ñagũxũ nüxũ. ¹⁶Rũ ngēmatama Naāē i Üünexũ nixĩ i aixcũma tũxũ nüxũ cuāxēēxũ na Tupanaxācũgũ na ixĩgũxũ. ¹⁷Rũ ñuxma na Tupanaxācũgũ ixĩgũxũ i yixema, rũ nüxũ tacuāx rũ daxũgũxũ i naānewa tá tanayaxu i ngēma mexũgũ i Tupana tũxna āxchaũxũ. Rũ ngēmaācũ

Cristumaã tá tūxũ nangẽxma i tachica i mexũ i Tupanaxũtawá, erũ Cristurũũ ngũxũ tingegũ na yixcũra wũxigu namaã mexũwa ingẽxmagũũcax.

**Ngẽma mexũ i yixcũra tá
nũxũ idauxũchiga**

¹⁸Rũ dũcax, rũ choma nagu charũxĩnũ rũ ngẽma ngũxũ i ñuxma ñoma i naãnewa ingegũxũ, rũ taxuũma nixĩ i ngẽxguma nagu nanguxgu i ngẽma mexũ i yixcũra tá nũxũ idauxũ i ngẽxguma Cristumaã ingẽxmagũgu i daxũguxũ i naãnewa. ¹⁹Rũ ñuxma rũ guxũma i tacũ i Tupana ũxũ rũ taxũ i norũ ngũchaũmaã ínananguxẽegũ i ngẽma ngunexũ i nagu tá nataeguxũ ya Cristu na Tupana guxũpexewa naxãcũgũxũ iwéxũ. ²⁰Rũ nũxũ tacuaxgũ rũ yexguma pecadu naxũxgu ga guma nũxĩraũcũ ga yatũ rũ yexguma nixĩ ga nachixexũ ga guxũma ga yema Tupana ũxũ. Rũ tama yema Tupana ũxũãrũ ngũchaũ nixĩ ga yema, natũrũ yemaãcũ nũxũ naxũpetũ yerũ ga Tupana rũ yemaãcũ inaxuneta ga yexguma pecadu naxũxgu ga guma yatũ. Natũrũ i ñuxma rũ guxũma ga yema Tupana ũxũ rũ ínananguxẽẽ na ngẽma chixexũwa ínanguxũxũcax. ²¹Erũ ngẽma ngunexũ i Tupana tá nagu nadexũ i naxãcũgũ na naxũtawá nangẽxmagũũcax, rũ ngẽxguma tá ta nixĩ i chixexũwa ínanguxũxẽãxũ i guxũma ga yema nũmatama naxũxũ. Rũ ngẽmaãcũ wenaxãrũ noxrĩrũũ tá name i guxũma. ²²Rũ nũxũ tacuax rũ guxũma ga yema Tupana ũxũ, rũ noxritama chixexũ nũxũ ũpetũgu rũ poraãcũxũchima nanaxwaxeecha na wenaxãrũ noxrĩrũũ namexũ. ²³Rũ tama ngẽmaxĩcatama nixĩ i poraãcũ nanaxwaxegũxũ na wenaxãrũ

noxrĩrũũ namexũ. Natũrũ yixema na yaxõgũxũ rũ ta tanaxwaxẽ na ínanguxũ ya Tanatũ na naxãcũgũxũ tũxũ na nadexũcax rũ ngexwacaxũxũ i taxũnegũ tũxna naxãxũcax. Rũ woo tũxũ na nangẽxmaxũ i Tupanaãẽ i Üünexũ i tũxũ nũxũ cuaxẽẽxũ na ñuxãcũ tá yĩxũ i daxũguxũ i naãnewa, natũrũ tanaxwaxẽ na paxa ngẽmaxũchi ingugũxũ. ²⁴Cristu tũxna nanaxã i maxũ i taguma gũxũ, natũrũ ítananguxẽẽgũmare na naxũ-tawá ingugũxũ na nayauxgũũcax i ngẽma maxũ. Natũrũ nũxũ tacuax rũ ngẽxguma chi marũ nũxũ idaugũgu i ngẽma írũnguxẽẽgũxũ, rũ taxucaxma tũxũcũ ítananguxẽẽgũ. Erũ ngẽma marũ nũxũ idauxũ, rũ taxucaxma ítananguxẽẽ. ²⁵Natũrũ ngẽxguma tauta nũxũ idaugũgu i ngẽma írũnguxẽẽgũxũ, rũ tanaxwaxẽ i meã ítananguxẽẽgũiecha ñuxmatáta nũxũ idaugũ. Rũ ngẽmaãcũ nixĩ i Cristuxũ írũnguxẽẽgũxũ. ²⁶Rũ Tupanaãẽ rũ tũxũ narũngũxẽẽ ta na iporaexũcax i ngẽxguma guxchaxũgũ tũxũ ũpetũgu. Rũ yixema rũ tama nũxũ tacuax na ñuxãcũ Tupanamaã idexagũxũ rũ tacũcax iyumũxẽgũxũ. Natũrũ Naãẽ i Üünexũ rũ naxauxãcũma ore i tama nũxũ icuaxũmaã Tupanamaã nidexa rũ taxcax nayumũxẽ. ²⁷Rũ Tupana ya meã tũxũ cuácũ rũ nũxũ nacuax na ñuxũ ñaxũchiga yĩxũ i ngẽma Naãẽ i Üünexũ nũxũ ixuxũ. Erũ ngẽma Naãẽ i Üünexũ rũ Tupana naxwaxexũãcũma Tupanaxũ nacaaxũ tũmacax ya yixema Tupanaãrũ duũxũgũ ixĩgũxe.

**Cristu rũ tũxũ naporaexẽẽãma na
taxuũma i guxchaxũgũ tũxũ
narũyexeraxũcax**

²⁸Rũ nũxũ tacuax rũ tũmaãrũ mexũcax nixĩ i Tupana ínanguxẽẽxũ i

guxūma i ngēma tūxū ūpetūxū ya yíxema nūxū ngechaūgūxe ga nūma nanaxwaxexūācūma tūxū yadexechixe. ²⁹Rū woetama nuxcūmama ga Tupana rū marū tūxū nacuax na texégū tá tixīgūxū ya yíxema noxrū ixīgūxe. Rū noxritama naāne ixīgūgumama tūxū nidexechi na Nanerūū timexū i napexewa, rū yima Nane rū tūmamaā nayaxūcax rū tūmamaā inacūāxūcax ya guxāma ya yíxema naēneēgū ixīgūxe. ³⁰Rū guxema noxri naāne ixīgūgumama Tupana tūxū idexechixe, rū tūmacax naca na noxrū tixīgūxūcax. Rū guxema tūmacax naçaxe, rū nūgūcax tūxū nimexēēgū. Rū guxema nūgūcax tūxū yamexēēgūxe, rū daxūwa tá tūxū nagagū na guxūgutāma naxūtawa tangēxmagūxūcax. ³¹¿Rū ñuxū ñagūxū tá i ñuxma i ngēmachiga? Rū ngēxguma Tupana taétūwa chogūgu, ¿rū texé tá tūxū rüyexeraxū? ³²Yerū nūma ga Tupana rū tama tūxna nayanuxū ga Nanexūchi. Natürū taxcax inanamu ga Nane na taxcax nayuxūcax i guxāma i yixema. Rū ñuxma na yemaācū taxcax inamuāxū ga Nane, ¿rū taux exna tūxna naxāxū i guxūma i tacū i inaxwaxexū na naxcax imaxēxūcax? ³³Rū Tupana tūxū nidexechi rū tūxū nixu na napexewa imexū. Rū ngēmacax ¿rū texé tá napexewa tūxū tixugū na ichixexū? Erū Tupanatama nixī ya tūxū ixucū na tūxū nataxuūma i chixexū. ³⁴¿Rū texé tá poxcuwa tūxū tamugū i ñuxmax? ¿Pexcax rū Cristu tá yīxū? Dūcax, taxucürūwama ngēmaācū nixī yerū Cristu nixī ga taxcax yucū na tūxū namaxēxēxūcax. Rū tama ngēxīcatama taxcax naxū, natürū wenaxārū ínarūda.

Rū ñuxma rū Tupanaxūtawa nangēxma rū ngēma āēxgacū nixī. Rū ngēma taétūwa nachogū rū Tupanaxū taxcax nacaaxū. ³⁵¿Rū ñuxma rū tacū tá Cristuna tūxū ixīgachixēēxū na tama tūxū nangechaūxūcax? Rū woo ngūxū ingegūgu, rū exna guxchaxūgū tūxū ngēxmagu, rū exna duūxūgū Cristugagu taxchi aiegu, rū exna itaiyaegu, rū exna ingexchirugūgu, rū exna āūcūmaxūwa ingēxmagūgu, rū exna duūxūgū tūxū daixchaūgu, natürū woo guxūma i ngēma tūxū ūpetūgu, natürū ya Cristu rū tāūtāma nūxū narūchau na tūxū nangechaūxū. ³⁶Natürū guxūguma āūcūmaxūwa tangēxmagū, ngēma Tupanaārū ore i ūmatūxū nūxū ixuxūrū. Erū ngēma ore rū ñanagürū:

“Rū cugagu duūxūgū toxū nadaixchaū rū duūxūgūpexewa rū ñoma carnerugū i daiwa īxūrū tixīgū”,

ñanagürū i ngēma ore. ³⁷Natürū woo guxūma i ngēma tūxū na ngupetūxū, rū Ngechuchu ya Cristu ya tūxū ngechaūcū, rū tūxū naporaexēēāma na taxuūma i guxchaxūgū tūxū nariyexeraxūcax, rū bai i tacū. ³⁸⁻³⁹Rū ngēmacax aixcūma chayaxō na taxucürūwama tacū Tupanana tūxū ixīgachixēēxū na ngēmaācū tama tūxū nangechaūxūcax. Rū woo iyuxgu rū woo imaxēgu, natürū Tupana tá tūxū nangechaūēcha. Rū taxucürūwama Tupanana tūxū nixīgachixēē i tacū i norū orearū ngeruūgū, rū exna tacū rū ngoxogū rū exna tacū i to i poraxū. Rū bai i tacū i ñuxma tūxū ūpetūxū, rū bai i tacū i yixcūra tá ngēxmaxū, rū bai i tacū i daxūwa ngēxmaxū, rū bai i tacū i

naānetüüwa ngēxmaxũ, rü bai i tacü i to i Tupana üxũ, rü taxucüriuwama Tupanana tüxũ nixigachixēē na tama tüxũ nangechaũxũcax. Rü ngēmaācü nixĩ i tüxũ nangechaũxũ ya Tupana nagagu ya tórü Cori ya Ngechuchu ya Cristu.

Tupana rü nayadexechi i Yudfugü na norü duũxũgü na yixigũxũcax

9 ¹Dücax, Pa Chaueneēgũx, rü pemaã tá nüxũ chixu i wüxi i ore. Rü ngēma ore i pemaã tá nüxũ chixuxũ rü aixcüma nixĩ erü Cristuarü duũxũ chixĩ. Rü tama chidora. Rü chauāēwatama nüxũ chacuax na aixcüma na yĩxũ i ngēma ore erü Tupanaāē i Üünexũ nixĩ i chauāēmaã icuáxũ. ²Rü poraācü changechaũ, rü choxũ nangúecha i chauāēwa, erü tama nayaxögü i chautanüxũgü i Yudfugü. ³Rü aixcüma pemaã nüxũ chixu rü guxũguma ngēma chautanüxũgu charüxinü, rü poraācü chanaxwaxe na Cristuaxũ yaxögüāxũ. Rü choma rü aixcüma íchamemare na poxcuwa choxũ namuxũ ya Tupana rü Cristuna choxũ yaxügachixēēxũ ega ngēmaācü chi nüxũ chayaxögüxēēgu rü chanamaxēēēgu i ngēma chautanüxũgü i Yudfugü. ⁴Rü nūmagü rü chauxrüü Yudfugü nixigü. Rü Tupana rü nuxcūmaxũchima namaã inaxuneta na naxācügü yixigũxũcax. Rü norü oxigü rü nüxũ nadaugü na ñuxācü namexēchixũ ga Tupana ga yexguma naxcax nangoxgux. Rü Tupana rü norü oxigümaã inaxuneta rü ñanagürü nüxũ:

“Rü ngēxguma chauga pexĩnüēgu rü tá pexũ charüngũxēē”,

ñanagürü nüxũ. Rü Tupana rü nüxna nanaxã ga yema mugü ga Moíché ümatüxũ. Rü nanangüxēē na ñuxācü nüxũ yacuaxũgũxũcax. Rü meāma namaã inaxuneta na Cristu rü naxcax núma tá namuāxũ na namaxēxēēāxũcax rü nüxna na naxāāxũcax i maxũ i taguma gúxũ. ⁵Rü yema nuxcūmaũgũxũ ga tórü oxigütaa nixigü i ngēma Yudfugü, rü ngēmacax naxcax ta nixĩ ga yema uneta ga tórü oxigümaã nüxũ yaxuxũ ga Tupana. Rü ngēma Yudfugütanüxũwatama nixĩ ga nabuxũ ga Cristu ya Tupanaxũchi ixĩcü ya guxũétüwa ngēxmacü. Rü tanaxwaxe i guxũguma nüxũ ticuaxũgü. Rü ngēmaācü yĩ. ⁶Rü ñuxma rü woo tama guxũ i Yudfugü na yaxögüxũ, natürü taxucüriuwama texé nüxũ tixu na Tupana rü tama yanguxēēāxũ i ngēma norü uneta. Erü ngēma Yudfugü rü tama aixcüma guxũma Tupanaärü duũxũgü nixigü. ⁷Rü tama guxũma i duũxũgü i Abráũtaagü ixigũxũ, rü aixcüma Abráũtanüxũ nixigü i Tupanapexewa. Yerü ga Tupana rü Abráũmaã nüxũ nixu, rü ñanagürü:

“Rü cune ya Ichaátanüxũgü tá nixĩ i aixcüma cutanüxũgü ixigũxũ i chopexewa”,

ñanagürü. Rü yemaācü namaã inaxuneta woo na nayexmaxũ ga togü ga Abráũxācügü. ⁸Rü ngēmawa meāma nüxũ tacuax rü tama ngēma na Abráũtaa tixigũxũcax nixĩ i Tupanaxācügü tixigũxũ. Natürü yíxema aixcüma Tupanaärü uneta nüxũ ixuxürüüācüma yaxögüxe waxi tixĩ ya aixcüma Abráũtaa ixigüxe i Tupanapexewa. ⁹Yerü naxũpa ga na

nabuxũ ga Abráũ nane, rü yema
Tupanaãrũ uneta ga Abráũmaã nüxũ
yaxuxũ, rü ñanagürü:

“Rü naĩ ya taunecüarũ ñuxgumaãcü
tá wena nuã chaxũ, rü cuxmaç i
Chara rü tá ixãxãcü i
ngëxguma”,

ñanagürü. ¹⁰Natürü tama
Abráũmaãxĩcatama nixĩ ga yemaãcü
yadexaxũ ga Tupana. Yerü törü õxi ga
Ichaã namaç ga Rebecamaã rü ta nidexa
ga Tupana. Rü ngĩma rü ngĩteaxũ
ixãxãcü rü nataxreexpũx ga ngĩne.
¹¹⁻¹³Natürü yexguma tauta nabuegu rü
taxuũma ga mexũ rü exna chixexũ
naxüegu ga yema ngĩnegü, rü
Rebecamaã nidexa ga Tupana, rü
ñanagürü:

“Rü ngẽma nüxĩra buxũ i cune, rü
ngẽma wixweama buxũãrũ
duũxũ tá nixĩ”,

ñanagürü ngĩxũ. Rü yema dexa rü
namaã nawüxigu i Tupanaãrũ ore i
ümatüxũ i ñaxũ:

“Marũ chanayaxu ya Acobu, natürü
nüxũ chaxo ya Echaú”,

ñaxũ. Rü yemaãcü ga Tupana rü ngĩmaã
nanangoxẽẽ na namexwa nangëxmaxũ
na tüxũ yadexechixũ ya yíxema
woetama nüxũ ngúchaũxẽ na tũmacax
naçaxũ tama nagu naxĩnũãcũma i ñacü
na taxüxũ. ¹⁴¿Rü nüxũ ñagüxũ i
ñuxmax? ¿Pexçax rü Tupana rü chixexũ
naxüxũ ga yexguma tama Acobuxũ
nangechaũxürũ nüxũ na nangechaũgu
ga Echaú? Rü dücax, tama chixexũ
naxü. ¹⁵Yerü norü orewa rü Tupana rü
Moĩchéxũ ñanagürü:

“Rü ngëxguma chi texémaã
chamecũmachaũgu, rü

tũmamaã tá chamecũma. Rü
choxũ tá tangechaũtũmũ ya
yíxema choxũ
ngechaũtũmũüchaũxẽ”,

ñanagürü. ¹⁶Rü ngẽmaãcü tama ngẽma
tũmatama tanaxwaxexũgagu rü exna
ngẽma taxüxũgagu nixĩ i Tupana tüxũ
yaxuxũ ya texé. Natürü tüxũ nayaxu erü
nüxũ tangechaũtũmũ. ¹⁷Rü
yexgumarũ ta ga Tupana rü norü ore i
ümatüxũwa rü ñanagürü nüxũ ga
Equituaneãrũ ãëxgacü:

“Rü ãëxgacüxũ cuxũ chingucuchixẽẽ
na cuwa duũxũgüxũ nüxũ
chadauxẽẽxũçax i ñuxãcü na
chaporaxũ. Rü ngẽmaãcü
chanaxü na guxũ i duũxũgü i
guxũ i naãnewa ngëxmagüxũ,
nüxũ na cuáxũçax i chauchiga”,

ñanagürü. ¹⁸Rü ngẽmaãcü ya Tupana rü
nüxũ tangechaũtũmũ ya yíxema nüxũ
ngechaũtũmũüchaũxẽ. Rü ngëxguma
tüxũ nataiãchiarü maxũãxẽẽchaũgu rü
tüxũ nanataiãchiarü maxũãxẽẽ ya
yíxema tama nüxũ cuáxchaũxẽ.

¹⁹Natürü bexmana tá ñacurügü choxũ:

“Rü ngëxguma chi ngẽmaãcü yixĩgu ya
Tupana, ¿rü tüxciũ nüxũ nixu na tagagu
yĩxũ na chixexũ ixüğüxũ rü tama naga
ixĩnüẽxũ? ¿Rü texé tabora na
itayanaxoxẽẽxũçax i Tupanaãrũ ngúchaũ?”
ñacurügü tá. ²⁰Natürü Pa Duũxũx, ¿texé
quixĩ i cuma rü ngẽmacax ngẽmaãcü
Tupanaxũ cuyaxũgaxũ? ¿Cuxçax rü exna
wüxi i tüxũ i waixũmũwa üxũ rü namexũ i
ngẽma norü üruũmaã na ñaxũ?

“¿Rü tüxciũ ngẽmaãcü choxũ cuxü na
ngẽmaãcü chixĩxũçax i ñuxmax?” ñaxũ.

²¹Rü ngẽma tüxũãrũ üruũ rü waixũmũwa
nanaxü i ñacü i nüma naxüxchaũxũ. Rü

ngëxguma nanaxwaxegu, rü ngëma waixũmüwa nanaxü i wüxi i tũxũ na norü meruũ yĩxũcax. Rü ngëxguma nanaxwaxegu, rü ngëmatama waixũmüwa nanaxü i wüxi i tũxũ na norü guxchirechixũ yĩxũcax. ²²Rü ngëxgumarüütama nixĩ i naxũãxũ ya Tupana. Erü tũxũ nanawéxchaũ na ñuxãcü naporaxũ i nũma rü ñuxãcü napoxcueãxũ i ngëma duũxũgü i chixexũ ügũxũ, natürü poraãcü yaxna namaã naxĩnũ i ngëma duũxũgü, rü tama paxa nanapoxcue i ngëma ímemaregũxũ na napoxcuexũ. ²³Natürü ga Tupana rü inanawéxchaũ na ñuxãcü poraãcü tamaã namecũmaxũ i yixema na yaxögũxũ. Rü ngëmacax nixĩ i nũxũ ingechaütümüügũxũ, rü nuxcũmatama tũxũ yadexechixũ na naxũtawa ingëxmagũxũcax i daxũgũxũ i naãnewa i ngextá ínamexëchixũwa. ²⁴Rü ngëmaãcü i yixema na Yudíugü ixĩgũxũ, rü tatanüwa Tupana tũxũ nidexechi ya ñuxre na norü duũxũgü tixĩgũxũcax. Rü ngëxgumarüũ ta i ngëma tama Yudíugü ixĩgũxũtanüwa rü nayadexechi i togü. ²⁵Rü ngëmacax rü Tupanaãrũ ore ga Ochéa ümatũxũwa rü ñanagürü:

“Rü ngëma duũxũgü i tama chorü duũxũgüchirëx ixĩgũxũ, rü: ‘Pema rü chorü duũxũgü pixĩgü i ñuxmax’, ñacharügü tá nũxũ. Rü ngëma duũxũgü i tama Yudíugürü nũxũ changechaũchirëxũ, rü: ‘Pexũ changechaũ i ñuxmax’, ñacharügü tá nũxũ. ²⁶Rü noxri ga Tupana rü yema duũxũgü ga tama Yudíugü ixĩgũxũmaã nũxũ nixu, rü ñanagürü nũxũ: ‘Pema rü tama chorü duũxũgü pixĩgü’,

ñanagürü nũxũ. Natürü yematama nachica ga ngextá nũxũ íyemañaxũwa, rü wenaxãrũ yema duũxũgü ga tama Yudíugü ixĩgũxũmaã nidexa ga Tupana ya Maxëxëerũ, rü ñanagürü nũxũ: ‘Pema rü chauxacügü tá pixĩgü’, ñanagürü nũxũ”.

Rü yema nixĩ ga Tupanaãrũ ore ga Ochéa ümatũxũ. ²⁷⁻²⁸Rü Yudíugüchiga rü ta nidexa i Tupanaãrũ ore, yerü nuxcũmaũcü ga norü orearü uruũ ga Ichaía rü ñanagürü:

“Rü woo namuxũchichirëx i Yudíugü yima naxnücü ya taxtũpechinüwa yimacürũũ, natürü noxre tátama nixĩ i aixcũma nayauxgũxũ i maxũ i taguma gũxũ. Rü paxa tá ínangu ya tórü Cori na napoxcueãxũcax i guxũma i ngëma tama noxrü ixĩgũxũ”, ñanagürü ga Ichaía. ²⁹Rü nũmatama ga Ichaía, rü ñanagürü ga ũpa:

“Rü ngëxguma chi nũma ya tórü Cori ya guxũ i naãneärü yora rü tãu chima íyaxügüxëëãgu i ñuxre i tatanũxũgü i Yudíugü, rü chi itayarüxoxochi, yexgumarüũ ga na iyanaxogũxũ ga guma ñanegü ga Chodoma rü Gomora namaã ga guxũma ga yema duũxũgü ga yéma yexmagũxũ”, ñanagürü ga Ichaía.

Yudíugü rü tama nayaxögüchaũ i ore i mexũ i Cristuchiga

³⁰¿Rü ñuxũ ñagũxũ i ñuxmax? Rü pemaã nũxũ chixu rü ngëma duũxũgü i

tama Yudíugü ixíğuxũ ga tama
Tupanacax daugũxũ ga noxrix, rü
ngematama duũxũgü nixĩ i ñuxma
Tupanapexewa imexũ yerü nayaxögü.
³¹Natürü yema Yudíugü ga nagu
ixchaũxũ ga yema Moichéari mugü na
Tupanapexewa yamexũcax, rü inatüe.
³²¿Rü ñuxacü inatüe? Dücax, inatüe
yerü yema mugüguama naxĩ na
Tupanapexewa yamexũcax, rü tama
Ngechuchuaxũ nayaxögüchaũ. Rü
yemaacü ga Ngechuchu rü yema
duũxũgücax rü wüxi ga guxchaxũ nixĩ.
³³Rü ngemachiga nixĩ i Tupanaärü ore i
ümatüxũ i ñaxũ:

“Choma rü Yudíugütanuwa
chanamu ya Cristu. Rü nüma rü
ngema Yudíugücax rü wüxi i
guxchaxũ tá nixĩ erü ngëxguma
tama nüxũ yaxögüägu rü tá
inayarütauxe. Natürü ngema
duũxũgü i nüxũ yaxögüxũ, rü
aixcüma tá namaxẽ”,

ñanagürü.

10 ¹Pa Chaueneëgüx, rü ngema
poraacü chanaxwaxexũ rü chorü
yumüxewa Tupanana naxcax chaçaxũ, rü
ngema nixĩ na guxũma i chautaniuxũgü i
Yudíugü na yaxögüxũ rü ngemaacü
aixcüma Tupanaärü na yixíğüxũcax. ²Rü
aixcüma pemaã nüxũ chixu, rü nümagü i
Yudíugü rü aixcüma poraacü Tupanagu
narüxinüë rü nanaxügüchaũ i Tupanaärü
ngüchaũ. Natürü inatüe erü tama
Cristuaxũ nayaxögüchaũ na ngemaacü
Tupanapexewa yamexũcax. ³Rü woo
Tupana ñoma ga naãnewa nanamu ga
Cristu na gumagagu Tupanapexewa
yamexũcax i duũxũgü, natürü nümagü i
Yudíugü rü tama nüxũ nacuaxgüchaũ i

ngëma. Rü nügütama nimexëëgüchaũ, rü
ngëmacax nagu naxiãma i ngëma mugü ga
Moiché ümatüxũ rü tama Cristuaxũ
nayaxögüchaũ na nagagu Tupanapexewa
yamexũcax. ⁴Natürü nüma ga Cristu rü
nayanguxëë ga yema mugü rü yemaacü
inayanaxoxëë na tama tamaã inacuaxũcax
i ngëma mugü. Rü yemaacü nanaxü ga
Cristu na guxũma i duũxũgü i nüxũ
yaxögüxũ rü aixcüma Tupanapexewa
yamexũcax. ⁵Rü Moiché nanaxümatü
nachiga na ñuxacü Tupanapexewa tamexũ
ya wüxie ega naga taxĩnügu i ngëma
mugü, rü ñanagürü:

“Tupana pexũ namu na guxũgutáma
meã peyanguxëëxũ i guxũma i
ngëma mugü erü ngëxguma naga
pexĩnüëgu i guxũma i ngëma mugü
rü tá pemaxë. Natürü ngëxguma
tama naga pexĩnüëgu i wüxitama i
ngëma mugü, rü täütáma pemaxë”,

ñanagürü. ⁶Natürü ñuxma rü
Tupanapexewa time ega Cristuaxũ
yaxögügu. Rü ngëmacax taxucaxma i
cuãëwa rü ñacurügü:

“¿Texé tá daxüguxũ i naãnewa taxũ
na Cristucax tayaçaxũ na nuã
naxũxũcax rü tüxũ yanangüxëëxũcax na
imexũcax i Tupanapexewa?” ñacurügü.
⁷Rü taxucaxma cuãëwa ñacurügü:

“¿Rü texé tá yuexütaniwa taxũ na
ngëxma Cristucax tayadauxũcax na nuã
tanagaxũcax?” ñacurügü. ⁸Erü tama
ngemaacü nixĩ i Cristucax idauxũ, yerü
yema ore ga Moiché ümatüxũ rü ñanagürü:

“Rü marü cuxütawa nangëxma i
Tupanaärü ore. Rü cuaxwa
nangëxma na nüxũ quixuxũcax.
Rü cuãëwa nangëxma na nagu
curüxinüxũcax”,

ñanagürü. Rü ñuxma Pa Chaueneëgüx, rü pemaã nüxü chixu rü ngëmatama ore nixí i guxüwama duüxügümaã nüxü tixuxü. Rü ngëma ore nixí i pexü nüxü cuaxëëxü na ñuxäcü pexü nangëxmaxü i maxü ega aixcüma peyaxögügu. ⁹Erü ngëxguma cuaxmaã nüxü quixuxgu na curü Cori yixü ya Ngechuchu, rü ngëxguma cuãewa cuyaxöxgu na yuwa Tupana ínadxëëxü, rü tá cuxü nangëxma i maxü i taguma gúxü. ¹⁰Erü taãewa tayaxögü na ngëmaäcü Tupanapexewa imexü. Rü taqxmaã nüxü tixu na Ngechuchu rü tórü Cori yixü, rü ngëmaäcü tanayaxu i maxü i taguma gúxü. ¹¹Rü Tupanaärü ore i ümatüxüwa rü ñanagürü:

“Rü guxāma ya texé ya Ngechuchuaxü yaxóxë, rü tá nüxü tadau na ñuxäcü Cristu aixcüma yanguxëëxü i ngëma tamaã inaxunetaxü, rü täütáma äuxächi tüxna naxā”,

ñanagürü. ¹²Rü Tupanapexewa rü guxüma i duüxügü rü nawüxigu. Rü woo Yudíugü yixígu rü exna woo tama Yudíugü yixígu, natürü Tupanapexewa rü nawüxigu i guxüma i duüxügü. Erü nüma ya tórü Cori, rü guxāärü Cori nixí. Rü nüma rü aixcüma tüxü namaxëëxë ya guxāma ya texé ya nüxna caxe na tüxü namaxëëxëxüçax. ¹³Erü Tupanaärü ore i ümatüxüwa rü ñanagürü:

“Rü guxāma ya texé ya tórü Corina caxe na tüxna naxāxüçax i maxü, rü tá tanayaxu i tümaärü maxü i taguma gúxü”,

ñanagürü. ¹⁴¿Natürü ñuxäcü tá tórü Corina naxçax tacagü, ega tama nüxü tayaxögügu? ¿Rü ñuxäcü tá nüxü

tayaxögü, ega taguma nüxü taxínüëgu i nachiga? ¿Rü ñuxäcü tá nüxü taxínüë i norü ore, ega taguma texé tümamaã nüxü ixuxgu? ¹⁵¿Rü ñuxäcü tá texé nüxü tixu i Cristuchiga ega taxúema tüxü nüxü yarüxuxëëgu? Rü ngëmacax nixí i Tupanaärü ore i ümatüxü i ñaxü:

“Rü wüxi i taã nixí na ínangugüxü i Tupanaärü orearü uruügü na duüxügümaã nüxü yaxugüxüçax i Tanatiärü ore i mexü i Cristuchiga”,

ñaxü. ¹⁶Natürü tama guxüma i duüxügü naga naxínüë i ngëma ore i mexü. Rü Ichaía nüxü ixuxürü nixí. Yerü ga nüma rü ñanagürü:

“Pa Corix, noxretama nixí i ngëma duüxügü i toxü yaxögüxü i ngëma ore i nüxü tixuxü”,

ñanagürü. ¹⁷Rü dücax, rü ngëma na Cristuchigaxü naxínüëxüwa nixí i ne naxüxü na yaxögüäxü i duüxügü. Rü ngëma nüxü naxínüëxü, rü ore i mexü i Cristuchiga nixí. ¹⁸Natürü i ñuxma rü pexna chaca, çexna pexçax rü ngëma Yudíugü rü taguma nüxü naxínüë i ngëma ore i mexü i Cristuchiga? Dücax, ngëmaäcü marü nüxü naxínüë. Erü Tupanaärü ore i ümatüxüwa rü ñanagürü:

“Rü ngëma Tupanaärü orearü uruügü, rü guxüwama i ñoma i naãnewa rü nüxü nixugüë i norü ore. Rü ngextá ínangëxmagüxüwa i Yudíugü, rü ngëma rü ta nüxü nixugügü”,

ñanagürü i ngëma ore. ¹⁹Natürü wena pexna chaca, ¿rü ngëma Yudíugü rü tama exna nüxü nicuaxächitanü na

Cristugagu yiixũ na Tupana nadexũ i duũxũgũ i ñuxmax? Rũ ngẽmáacũ nüxũ nacuaxgũ. Yerũ Tupanaärũ ore ga Moĩché ũmatũxũwa rũ ñanagürũ:

“Dücax, Pa Yudfugũx, choma rũ tá chanamaxẽẽ i ngẽma duũxũgũ i tama Yudfugũ ixĩgũxũ, rũ ngẽmacax i pema rũ tá pixãũxãchigũ. Rũ ngẽxguma chanamaxẽẽẽgu i ngẽma togũ i duũxũgũ i tama choxũ cuaxgũchiréxũ, rũ pema i Yudfugũ rũ tá penuẽ erũ nüxũ charũngũxẽẽ i ngẽma togũ”, ñanagürũ. ²⁰Rũ yemawena ga Ichaía, rũ tama namuũ ga yema Yudfugũmaã nüxũ na yaxuxũ ga yema Tupanaärũ ore ga ñaxũ:

“Rũ ngẽma duũxũgũ i tama Yudfugũ ixĩgũxũ i tama chauxcax daugũxũ, rũ choxũ tá inayangaugũ. Rũ choma rũ tá chaugũ changõxẽẽ naxcax i ngẽma duũxũgũ i tama chauxcax ícagũchiréxũ”, ñaxũ. ²¹Rũ Tupana rũ Ichafawa Yudfugũchiga nidexa rũ ñanagürũ:

“Rũ guxũ i ngunexũgu rũ nüxna chaxuecha i ngẽma duũxũgũ i tama chauga ñnũẽchaũxũ rũ chomaã nuẽxũ. Natürũ tama choxũ inarũxĩnũẽchaũ”, ñanagürũ.

Nangẽxma i ñuxre i Yudfugũ i Tupana idexechixũ na aixcũma noxrũ yixĩgũxũcax

11 ¹Ñuxma pexna chaca rũ, ípexcax ẽxna ya Tupana rũ marũ nüxũ naxo i norũ duũxũgũ i Yudfugũ? Tama nixĩ i nüxũ naxoxũ. Erũ

choma i Paurũ rũ Yudfũ chixĩ. Rũ Abrãũtanũxũ chixĩ, rũ Abrãũtaa ya Beyamĩtanũxũ chixĩ. ²Rũ nuxcũmamatama Tupana Yudfugũmaã inaxuneta na norũ duũxũgũ yixĩgũxũcax, rũ ñuxma rũ tama Yudfugũxũ naxo. ¿Tama ẽxna nüxũ pecuax na ñuxũ ñaxũ ga Tupanaärũ orearũ uruũ ga Ería? Rũ Tupanaärũ orewa nüxũ tadaugũ rũ Ería rũ Tupanapexewa poraãcũ yema Yudfugũxũ inaxuaxũ. ³Rũ ñanagürũ ga Ería:

“Pa Corix, ngẽma Yudfugũ rũ marũ nanadai i curũ orearũ uruũgũ. Rũ nagu napogũe i ngẽma nachicagũ i ngextá duũxũgũ cuxũ ícuaxũũgũxũwa. Rũ chaxicatama íchayaxũãchi. Rũ choxũ rũ ta nimaxgũchaũ”, ñanagürũ ga Ería. ⁴Natürũ Tupana nanangãxũ, rũ ñanagürũ:

“Dücax, choma rũ marũ choxũ nangẽxma i 7000 i yatũgũ i chaugũcax chidexechixũ. Rũ nümagũ rũ taguma nüxũ nicuaxũũgũ i ngẽma tupanenetachicũnãxã i Baá”, ñanagürũ. ⁵Rũ ngẽxgumarũũ ta nixĩ i ñuxmax. Rũ woo muxũma i Yudfugũ tama nayaxõgũ, natürũ nangẽxma i ñuxre i Tupana namaã mecũmaxũgagu yadexechixũ. ⁶Rũ ñuxma na Tupana namaã mecũmaxũgagu yadexechixũ i ngẽma duũxũgũ, rũ ngẽmacax taxucürũwama texé nüxũ tixu na tacũ rũ puracũ i mexũcax na yadexechiãxũ. Erũ ngẽxguma chi ngẽma duũxũgũarũ puracũ i mexũcax yadexechiãgu, rũ taxucax chima tũxcũũ Tupana namaã

namecūma. ⁷¿Rü ñuxācü yīxŭ i ñuxmax? Rü ngēma rümumaēxŭ i Yudfugü rü tama nüxŭ inaya-ngaugü i ngēma maxŭ i naxcax nadaugŭxŭ. Natürü ngēma noxretama i Yudfugü i Tupana idexechixŭ, rü ngēmaācü nüxŭ inayangaugü i ngēma maxŭ. Rü guxŭma i ngēma togü i Yudfugü rü Tupana nüxŭ nanaguxchaxēē. ⁸Rü ngēmachiga nixŭ i Tupanaārü ore i ümatixŭ i ñaxŭ:

“Tupanatama ngēma duŭxŭgüaxŭ nanaguxchaxēē. Rü ngēmacax woo nüxŭ nadaugügu i ngēma ore i aixcūma ixŭxŭ, rü tama nüxŭ nacuaxgüéga. Rü woo nüxŭ naxŭnŭégu i ngēma ore, rü tama nayaxögü. Rü ñuxma rü ta ngēmaācü nixŭ”,

ñanagürü. ⁹Rü Dabŭ rü ta rü ñanagürü:

“Rü ngēma duŭxŭgü rü norü petacax naxŭgŭxŭ i ñonagügagu rü norü muxŭma i ngēmaxŭgügagu rü chixexŭgu tá nayŭ rü ngēmacax tá napoxcue. ¹⁰Rü naāēwa rü tāūtáma nüxŭ nacuaxgŭ, rü guxchaxŭgü tá nüxŭ nangēxma. Rü ñoma wüxi i duŭxŭ i tacü i yaxŭ ípaxixŭrŭü tá nixŭgü namaā i norü guxchaxŭgŭ”,

ñanagürü.

Tupana nanamaxēxēē i ngēma togü i tama Yudfugü ixŭgŭxŭ

¹¹Rü pexna chaca, rü ñuxma na Cristuxŭ naxoexŭ i ngēma Yudfugü, ¿rü pexcax exna rü ngēmacax ya Tupana rü tá nüxŭ naxoxochixŭ? Tama nüxŭ naxo. Natürü ñuxma na tama Cristuaxŭ yaxögüāxŭ i ngēma Yudfugü, rü

ngēmacax ya Tupana rü nüxŭ narüngŭxēē rü nanamaxēxēē i ngēma togü i tama Yudfugü ixŭgŭxŭ. Rü ngēmaācü nanaxŭ ya Tupana na yaxāŭxāchiexŭcax i ngēma Yudfugü, rü Cristuaxŭ na yaxögüāxŭcax. ¹²Rü yema na ínatüexŭ ga yema Yudfugü, rü yemagagu muxŭma ga togü ga duŭxŭgü nanayauxgü ga Tupanaārü ngŭxēē i taxŭ. Rü yema na noxretama ga Yudfugü nayaxögŭxŭ, rü yemagagu Tupana nanamaxēxēē ga yema tama Yudfugü ixŭgŭxŭ. Natürü ngēxguma tá Tupanacax nawoeguxgu i guxŭma i Yudfugü, rü Tupana rü tá yexeraācü nüxŭ narüngŭxēē i guxŭma i ngēma duŭxŭgü i tama Yudfugü ixŭgŭxŭ. ¹³⁻¹⁴Rü ñuxma Pa Duŭxŭgü i Tama Yudfugü Ixŭgŭxŭ, rü choxŭ nangēxma i wüxi i ore i pemaā nüxŭ chixuxchaŭxŭ. Rü dücax, petanüwa nixŭ i choxŭ namuxŭ ya Tupana na pemaā nüxŭ chixuxŭcax i norü ore. Rü ñuxma rü aixcūma meā chayanguxēē i ngēma puracü, erü chanaxwaxe na pexŭ nadaugŭxŭ i ngēma chautanüxŭ i Yudfugü na ñuxācü Tupana pexŭ na rüngŭxēēxŭ. Rü ngēmaācü tá nixāŭxāchie i ñuxre i nümagü, rü tá Cristuaxŭ nayaxögü, rü ngēmaācü tá nanayauxgü i maxŭ i taguma gŭxŭ. ¹⁵Nüxŭ tacuax rü ngēma Yudfugü rü tama Cristuaxŭ nayaxögŭchaŭ i ñuxmax. Rü ngēmacax ya Tupana rü nanade i ngēma togü i duŭxŭgü i tama Yudfugü ixŭgŭxŭ. Natürü ñuxma na ngēmaācü yīxŭ, ¿rü ñuxācü tá nixŭ i ngēxguma Cristuaxŭ yaxögüāgu i ngēma Yudfugü, rü wena Tupana nadexgu? Rü wüxi i mexēchixŭ tá nixŭ naxcax i

ngēma Yudfugü. Erü ñoma wüxi i duñxü i yuxü rü wenaxärü maxüürüü tá nixigü. ¹⁶Rü Tupana rü wena tá nanade i ngēma Yudfugü i ngēxguma yaxögüägu. Rü ngē-maäcü tá nixi, yerü nuxcūmaücü ga nanatü ga Abräu rü Tupanaärü duñxü nixi. Rü ngēmacax i nataagü i Yudfugü rü Tupanaärü duñxügü ta nixigü. Rü ñoma wüxi i päu i Tupanana ixäxürrüü tá nixi. Erü ngēxguma ngēma päuwa íraxü Tupanaärü yixigu, rü ngēmawa nüxü tacuax na guxüma i ngēma päu rü noxrü na yīxü. Rü ngēma wüxi i nanetü i Tupanana ixäxürrüü tá nixi. Rü ngēxguma ngēma nanetüchumaxä rü Tupanaärü yixigu, rü ngēmawa nüxü tacuax na guxüma i ngēma nanetü rü noxrü na yīxü. Rü ngēmaäcü tá nixi i ngēma Yudfugümaä nangupetüxü, erü wüxi i ngunexügu rü guxüma i nūmagü rü Tupanacax tá nawoegu. ¹⁷Tupana nüxü naxo ga yema Yudfugü ga tama yaxögüchaüxü. Rü ñoma wüxi i orixchacüü i idaexürrüü nixi ga yema Yudfugüxü naxoxü. Natürü nachicüü Tupana pexü nade woo tama Yudfugü na pixigüxü. Rü wüxi i naixnecüçüax i orixchacüü rü orix i toxüwa yariñaxcuchixürrüü pixigü. Rü ñuxma i pema rü ta pexü nangexma i pechica i natanüwa i ngēma duñxügü i Tupanaärü ixigüxü. Rü Tupana rü pexü narüngüxëe rü pexü rü ta namaxëxë. ¹⁸Natürü pema i tama Yudfugü na pixigüxü, rü tama name i pegü picuaxüü rü nüxü pixu na ngēma Yudfugüärü yexera pixigüxü. Rü ngēxguma chi ngēmaäcü pegü picuaxüügüchaügu, rü name nixi i

nüxna pecuaxächie na tama petanüwa ne naxüxü ga Cristu ya pexü maxëxëcü, natürü Yudfugütanüwa nixi ga ne naxüxü. Rü ngēma Yudfugügagu nixi i Tupana pexü dexü rü pexü namaxëxëcü i ñuxmax. ¹⁹Natürü bexmana tá ñaperügügü:

“Tupana rü marü nüxü naxo ga yema Yudfugü rü yemacax nachicüü tüxü nade”, ñaperügügü tá. ²⁰Ngēmaäcü aixcūma nixi ga Tupana nüxü oxü ga yema Yudfugü yerü tama nayaxögü. Rü ngēma na peyaxögüxüçaxicatama nixi i nachicüü Tupana pexü dexü i ñuxmax. Rü ngēmacax tama name i pegü picuaxüügü. iNatürü pexuäëgü na tama yema Yudfugüxü üpetüxürrüü pexü üpetüxüçax! ²¹Yerü yema Yudfugü ga noxri Tupanaärü ixigüxü, rü Tupana nüxü naxo yerü tama nayaxögü. Rü yexguma yemaäcü Tupana nüxü oxgu ga yema duñxügü rü pexü rü tá ta naxo ega täütama peyaxögüechagu. ²²Dücax, na ñuxäcü namecūmaxü ya Tupana. Natürü tüxü napoxcu ta ega tama aixcūma yaxögügu. Rü nanapoxcue ga yema duñxügü ga chixexügu yixü, natürü pemaä rü namecūma. Natürü penaxwaxe i guxüguma nūma nanaxwaxexüäcūma pemaxë rü peyaxögü na guxüguma pemaä namecūmaëchaxüçax. Erü ngēxguma tama nūma nanaxwaxexüäcūma pemaxëgu rü tama peyaxögüechagu, rü täütama pemaä namecūma. Rü pexü rü tá ta naxo, rü tá pexü ínawogü. ²³Natürü ngēxguma yaxögüägu i ngēma Yudfugü i ñuxma maxëxü, rü woo Tupana na nüxü oxü ga noxrix, natürü wena táxarü nanade erü nüxü

nangēxma i pora na wenaxārū
nadeāxūcax ega aixcūma yaxōgūāgu.
24Rū pema na tama Yudfugū na
pixīgūxū, rū tama Tupanaārū duūxūgū
pixīgū ga noxrix. Natürū Tupana pexū
nade na noxrū pixīgūxūcax. Rū ñuxma
na yemaācū Tupana pexū dexū, rū
ngēxguma yaxōgūāgu i ngēma Yudfugū,
rū Tupana rū pexū nadexūārū yexera tá
nūxū natauxcha na nadeāxū i ngēma
Yudfugū, yerū woetama norū
duūxūgūchirex nixīgū ga noxrix.

**Wūxi i ngunexū rū guxūma i Yudfugū tá
nanayauxgū i maxū i taguma gūxū**

25Pa Chaueneēgū i Yaxōgūxū,
nangēxma i wūxi i ore ga noxri tama
duūxūgūxū nūxū nacuxēēxū ga
Tupana. Natürū chanaxwaxe i nūxū
pecuax i ngēma ore na tama nagu
perūxīnūēxūcax na duūxūgū i nūxū
cuaxūchixū pixīgūxū, rū pexicatama
Tupana pexū dexū. Rū dūcax,
noxretama nixī i ngēma Yudfugū i
aixcūma yaxōgūxū. Rū ngēmaācū tá nixī
ñuxmatáta yaxōgūā i guxūma i ngēma
togū i duūxūgū i Tupana idexechixū.
26Natürū ngēmawena rū guxūtáma i
Yudfugū rū tá ta nayaxōgū, rū tá
nanayauxgū i maxū i taguma gūxū. Erū
Tupanaārū ore i ūmatūxūwa rū
ñanagürū:

“Yima Cristu ya ínanguxūxēēcū, rū
Yudfugūtanūwatama ne naxū.
Rū nūma rū tá Yudfugūxū
chixexūwa ínanguxūxēē. 27Rū
aixcūma norū pecaduwa tá
íchananguxūxēē i ngēma
Yudfugū. Rū ngēxguma tá nixī
na aixcūma chayanguxēēxū i

ngēma chorū uneta ga
ūpaxūchima Abráūmaā nūxū
chixuxū”,

ñanagürū ga Tupana. 28Natürū i ñuxma
ya Tupana rū Yudfugūxū nadau na norū
uwanūgū yīxū erū tama nayaxōgū i
ngēma ore i mexū. Natürū ngēmaācū
naxūpetū na pexū natauxchaxūcax na
peyaxōgūxū i pema i tama Yudfugū na
pixīgūxū. Natürū nūma ya Tupana rū
ñuxma rū ta ngēma Yudfugūxū
nangechaū yerū nuxcūmaūgūxū ga norū
oxīgūmaā inaxuneta na nūxū tá
nangūxēēxū. 29Rū ngēxguma Tupana rū
tacū i mexūmaā inaxunetagu, rū
aixcūma nayanguxēē i ngēma, rū
taguma nūxū inayarūngūma. Rū
ngēxgumariū ta i ngēxguma texécax
nacaxgu, rū taguma nūxū
inayarūngūma i ngēma. 30Rū pema na
tama Yudfugū pixīgūxū, rū ūpa rū tama
Tupanaga pexīnūē. Natürū ñuxma na
tama naga naxīnūēxū i Yudfugū, rū
ngēmacax Tupanaāxū
pengechaūtūmūgū erū peyaxōgū i
pemax. 31Rū ngēma pexū ngupetūxūrū
nixī i ngēma Yudfugūxū nangupetūxū.
Nūmagū rū tama Tupanaga naxīnūē i
ñuxmax, natürū ngēmaācū nūxū
nangupetū na Tupanaāxū
pengechaūtūmūgūxūcax, rū nūmagū rū
ta Tupanaāxū nangechaūtūmūgūxūcax
i ñuxmax. 32Yerū nūma ga Tupana rū
guxūma ga duūxūgūmaā nanaxuegu na
chixexūwa nangēxmagūxū nagagu ga
norū pecadugū. Natürū yemaācū namaā
nanaxuegu ga Tupana na nūxū
nangechaūtūmūgūxūcax i guxūma i
duūxūgū. 33Rū namexēchi ya tórū
Tupana, rū poraācūxūchima tūxū

narüñgũxêẽ. Rü nüma rü nüxũ
nacuaxũchi erũ guxũxũma nacuax. Rü
yixema rü taxucũrũwama nüxũ tacuax i
tũxcũũ yĩxũ i tũxũ yadexechixũ, rü
taxucũrũwama nüxũ tacuax i guxũma i
ngẽma naxũxũ i nümax. ³⁴¿Erũ texé i
tatanũwa nüxũ tacuax i guxũma i
ngẽma tórũ Cori nagu rüxĩnũxũ? ¿Rü
texé nüxũ tacuax na tórũ Corixũ
taxucũxêxũ? ³⁵¿Rü texé tũxira tacũ rü
ãmare tórũ Corina taxa, na yixcama
nüxĩ tacũmaã tũxũ nataeguxêẽaxũcax?
³⁶Erũ guxũma i tacũ ingẽmaxũ rü
Tupanaxũtawa ne naxĩ. Rü nüma nixĩ ga
naxũãxũ ga guxũma na noxrũ yĩxũcax.
Rü name nixĩ i guxũguma nüxũ
ticuaxũũgũ rü tanataxêẽ. Rü ngẽmaãcũ
yĩ.

Pexũ chacaqaxũ na pegũtama

**Tupanana pexãgũxũ na wũxi i ãmare i
maxũxũ na pixĩgũxũcax**

12 ¹Rü dücax, Pa Chaueneẽgũx,
ñuxãcũ Tupana
poraãcũxũchima tamaã namecũma. Rü
ngẽmacax pexũ chacaqaxũ na pegũtama
Tupanana pexãgũxũ na wũxi i ãmare i
maxũxũ na pixĩgũxũcax. Rü ngẽma
ãmare nixĩ i aixcũma napexewa üünexũ
rü namaã nataãexũ. Rü ngẽmaãcũ nixĩ
ya Tupana i nanaxwaxexũ na nüxũ
pĩcuaxũũgũxũ. ²Rü tama name i ñoma i
naãnecũãx i duũxũgũcũmagu pexĩ.
Natürũ name nixĩ i Tupanana pegũ
pexãgũ na nüma pexũ naxũchicũxũcax
rü ngexwacaxũxũ i peãẽ pexũ
ngẽmaxũcax rü ngẽmaãcũ
naxcaxicatama pemaxêxũcax. Rü
ngẽmaãcũ tá nüxũ pecuax i tacũ nixĩ i
Tupana pexũ naxwaxexũ na penaxũxũ,

rü tacũ nixĩ i aixcũma mexũ i napexewa,
rü tacũ nixĩ i namaã nataãexũ. ³Rü
Tupana ya chomaã mecũmacũ, rü choxũ
namu na pemaã nüxũ chixuxũcax i
guxãma i pema na tama namexũ na texé
i petanũwa tũgũ írũtaxũ rü tũgũgu
tarũxĩnũxũ na togũarũ yexera tiĩxũ.
Natürũ name nixĩ na wũxichigũ meã
tũgũ ngugũarũ maxũãxũ rü tũgũgu
rüxĩnũxũ na ñuxãcũ Tupana tũxna
naxãxũ i tũmaãrũ cuax wũxigu namaã i
tũmaãrũ õ. ⁴Rü dücax, rü taxũnewa
nangẽxma i taeru rü tachacũũgũ rü
taparagũ rü muxũma i to i taxũneãrũ
ngẽmaxũgũ. Rü wũxichigũ i ngẽma
taxũneãrũ ngẽmaxũgũ rü nüxũ
nangẽxma i noxrũtama puracũ. ⁵Rü
ngẽxgumarũũ ta i yixema na yaxõgũxũ,
rü woo na imuxũ natürũ wũxitama i
duũxũgũ tixĩgũ, erũ Cristuarũ duũxũgũ
tixĩgũ. Rü ngẽmacax i guxãma i yixema
rü yigũmũcũgũ tixĩgũ, erũ woetama
wũxitama i duũxũgũ tixĩgũ. ⁶Rü
wũxichigũ i yixema, rü Tupana tũxna
nanaxã i tórũ cuax i nüma nanaxwaxexũ
na tũxũ nangẽmaxũ. Rü tanaxwaxe i
meãma nagu taxĩ i ngẽma cuax i
Tupana tũxna ãxũ. Rü ngẽxguma tũxna
naxããgu i tórũ cuax na norũ orearũ
uruũ ixĩgũxũcax, rü name nixĩ i ngẽma
õ i tũxũ ngẽmaxũmaã tanaxũ i ngẽma
puracũ. ⁷Rü ngẽxguma tũxna naxããgu i
tórũ cuax na togũxũ rüñgũxêẽgũxũcax,
rü name nixĩ i meãma tanaxũ i ngẽma.
Rü ngẽxguma texéna naxããgu i tũmaãrũ
cuax na togũxũ tangũxêẽxũcax, rü
name nixĩ i meãma tanaxũ i ngẽma. ⁸Rü
yixema nüxũ cuãxe na Tupanaãrũ
oremaã togũxũ tataãxêẽxũ, rü name
nixĩ i meãma tanaxũ i ngẽma. Rü

yíxema nüxũ cuáxe na togümaã
 taŋgauxũ i tũmaãrũ ngẽmaxũ, rü name
 nixĩ i tũmaãrũ ngũchaũmaã tanaxü i
 ngẽma. Rü yíxema ãẽxgacũ ixĩxẽ rü
 name nixĩ i meãma tayanguxẽẽ i ngẽma
 puracũ. Rü yíxema nüxũ cuáxe na togü
 tüxũ ngechaũtũmũũgũxũ, rü name nixĩ i
 taãẽacũma tanaxü i ngẽma.

**Ñuxacũ nanaxwaxe na namaxẽxũ i
 duũxũgũ i Cristuaxũ yaxõgũxũ**

⁹Rü name nixĩ i aixcũma meãma pegü
 pengechaũgũ i wüxichigü. iRü nüxũ
 pexo i guxũma i ñacü i chixexũ ixĩxũ!
 iRü nagu pexĩ i ngẽma aixcũma mexũ
 ixĩxũ! ¹⁰Rü name nixĩ i wüxichigü pegü
 pengechaũgũ, ngẽma pegüeneẽxũchixũ
 pengechaũxũrũ. Rü name nixĩ i naxçax
 pedaugü na ñuxacũ peeneẽgũxũ
 petaxẽẽxũ rü ñuxacũ pegü
 perüŋgũxẽẽxũ. ¹¹Rü tama name i cuxo
 ega ñacü rü puracũ cuxũ namuxgu ya
 tórü Cori. Natürü name nixĩ i curü
 ngũchaũmaã cunaxü i norü puracũ.
¹²Rü name nixĩ i petaãẽgü erü
 ípenanguxẽẽ na Tupanaxũtawa
 pengugũxũ. Rü ngẽxguma ñacü rü
 ngũxũ pexũ ngupetügu, rü name nixĩ i
 yaxna namaã pexĩnũ. iRü tama name i
 nüxũ perũchaue na peyumũxẽgũxũ!
¹³Rü ngẽxguma nüxũ pedaxgu na ñacü
 nüxũ taxuxũ i ngẽma togü i yaxõgũxũ,
 rü name nixĩ i nüxũ perüŋgũxẽẽ. iRü
 meã penayaxu i ngẽma duũxũgũ i
 pexũtagu naxĩanexũ! ¹⁴Rü ngẽxguma
 chi texé chixri pemaã üpetügu, rü name
 nixĩ i tũmacax peyumũxẽgü na meã
 tüxũ naxüpetüxũçax. Rü ngẽmaacũ
 name nixĩ i Tupanana tũmacax peca na
 tüxũ nangũxẽẽxũçax rü tama tüxũ

napoxcuxũçax. ¹⁵iRü wüxigu tũmamaã
 petaãẽgü ya yíxema taãẽgũxe! iRü
 wüxigu tũmamaã pexaxe ya yíxema
 ngechaũgũxe rü auxexe! ¹⁶iRü meã
 pegümaã pemaxẽ i wüxichigü! iRü tama
 pegü picuaxũũgũ, natürü name nixĩ i
 pegü íperüxĩragü! iRü tama pegügu
 perüxĩnũ na togüarü yexera nüxũ
 cuaxũchigũxũ na pixĩgũxũ! ¹⁷Rü
 ngẽxguma texé chixexũ pemaã üxgux,
 irü tãütãma chixexũmaã pexütanü!
 Natürü name nixĩ i naxçax pedau na
 mexũ pexũxũ i guxũ i duũxũgũpexewa.
¹⁸iRü naxçax pedau na guxũma i
 duũxũgũmaã meã pemaxẽxũ rü namaã
 na íperüŋgũxmũxũçax i guxũguma! ¹⁹Pa
 Chaueneẽgü ya Pexũ Changechaũgũxe,
 tama name i pegütama pexütanü ega
 texé ñacü rü chixexũ pemaã üxgu.
 Natürü name nixĩ i Tupanamexẽgu
 penaxü i ngẽma na nüma
 napoxcuaxũçax. Erü Tupanaãrũ ore i
 ümatüxũwa rü ñanagürü:

“Rü choxmexwa nangẽxma na
 duũxũgũxũ chapoxcuxũ i norü
 chixexũçax. Rü choma tá nüxũ
 chanaxütanü i ngẽma duũxũ i
 chixexũ üxũ”,

ñanagürü ya tórü Cori. ²⁰Rü ngẽxguma
 ñacü rü chixexũ cumaã naxüxgu i togü,
 rü tama name i chixexũmaã
 cunataeguxẽẽ. Natürü name nixĩ i nagu
 quixũ i Tupanaãrũ ore i ñaxũ,

“Rü ngẽxguma curü uwanü taiyaxgu,
 irü nachibüxẽẽ! Rü ngẽxguma
 yañawaxgu, irü naxaxexẽẽ! Erü
 ngẽxguma ngẽmaacũ cunaxüxgu,
 rü poraacũ tá cunaxãnexẽẽ”,
 ñaxũ. ²¹Rü ngẽxguma togü chixexũ
 cumaã üxgux, rü name nixĩ i cuxuãẽ na

tama chixexũgu cunguxũcax. Rũ name nixĩ na mexũ cuxixũ namaã i ngẽma duũxũ. Rũ ngẽmaãcũ tá icuyanaxoxẽẽ i ngẽma chixexũ i cumaã naxũchaũxũ.

13 ¹Rũ name nixĩ i guxũma i duũxũgũ rũ meã nórũ ãẽxgacũga naxĩnũẽ. Erũ Tupana nixĩ i yangucuchixẽẽcũ i guxũma i ãẽxgacũgũ. Erũ nataxuma i ãẽxgacũ i tama Tupana ingucuchixẽẽxũ. ²Rũ ngẽmacax, texé ya tama tũmaãrũ ãẽxgacũga ñũchaũxẽ, rũ Tupanaga nixĩ i tama taxĩnũxũ. Rũ yĩxema tama naga ñũẽchaũxẽ, rũ tá tapoxcue. ³Erũ ngẽma ãẽxgacũgũ rũ tama ngẽma mexũ ũgũxũãrũ poxcuruũ nixĩ, natũrũ ngẽma chixexũ ũgũxũãrũ poxcuruũ nixĩ. Rũ ngẽxguma cunaxwaxegu na tama nũxũ cumuũxũ i wũxi i ãẽxgacũ, rũ name nixĩ i meã cumaxũ. Rũ nũma i ãẽxgacũ rũ tá cumaã nataãẽ. ⁴Erũ nũma i ãẽxgacũ rũ Tupanaãrũ ngũxẽẽruũ nixĩ rũ ngẽmacax nanamu na cuxũ nangũxẽẽxũcax. Natũrũ ngẽxguma chixri cumaũxgu, rũ ngẽxguma tá waxi nixĩ i nũxũ cumuũxũ. Erũ nũma i ãẽxgacũ rũ tama natũcaxma nixĩ na nũxũ nangẽxmaxũ i pora na cuxũ napoxcuxũ. Erũ woetama Tupana nanamu na napoxcuãxũcax i ngẽma duũxũ i chixri maxũxũ. ⁵Rũ ngẽmacax name nixĩ i naga cuxĩnũ i curũ ãẽxgacũgũ. Rũ tama ngẽma poxcuxũ na cumuũxũcaxicatama nixĩ i namexũ na naga cuxĩnũxũ, natũrũ name nixĩ i naga cuxĩnũ erũ marũ nũxũ cucuax na namexũ i ngẽma. ⁶Rũ ngẽmacax name nixĩ i meã nũxũ penaxũtanũ i ngẽma dĩeru i perũ ãẽxgacũgũcax ixĩxũ i ngẽma nũmagũ nagu naxunetaxũẽxpũx na nũxũ penaxũtanũxũcax. Erũ ngẽma

ãẽxgacũgũ rũ Tupanaãxũ nixĩ i napuracũexũ i ngẽxguma naxũãgu i ngẽma puracũ na pemaã inacuaũxũ. ⁷Rũ wũxichigũ i ngẽma ãẽxgacũgũ, rũ name nixĩ i nũxna penaxã i ngẽma nũxna ũxũ. iRũ nũxũ penaxũtanũ i ngẽma dĩeru i perũ ãẽxgacũgũ nagu unetaxũẽxpũx na nũxũ penaxũtanũxũ! iRũ penaxũx i ngẽma ñãneãrũ puracũ i perũ ãẽxgacũgũ pexũ muxũ na penaxũxũcax! iRũ nũxũ pengechaũgũ rũ naga pexĩnũẽ i ngẽma perũ ãẽxgacũgũ! Erũ ngẽmaãcũ nixĩ i namexũ na penaxũxũ. ⁸Rũ tama name i texéaxũ tacũ pengetanũ. Natũrũ nangẽxma i wũxitama i ngetanũ i taguma tũxũ ingutanũxũ. Rũ ngẽma nixĩ na yigũ ingechaũgũxũ. Rũ ngẽmacax ya yĩxema aixcũma tũmamũcũxũ ngechaũxẽ rũ marũ tayanguxẽẽ i guxũma i ngẽma Tupana tũxũ muxũ. ⁹Rũ ñanagũrũ i Tupanaãrũ mugũ:

“iRũ tãũtãma ñã i ngemaã icupe!
iRũ tãũtãma cumáẽta! iRũ
tãũtãma cungĩx! iRũ tãũtãma
toquãxãrũ ngẽmaxũ cuxũ
nangũchaũ!”

ñanagũrũ. Natũrũ ngẽma mugũ rũ guxũma i togũ i Tupanaãrũ mugũmaã rũ wũxigu nanu nagu i norũ ore i ñaxũ:

“iRũ nũxũ nangechaũ i cumũcũ na
cugũtama cungechaũxũrũ!”

ñaxũ. ¹⁰Rũ yĩxema tũmamũcũxũ ngechaũxẽ, rũ taxuũma i chixexũ namaã taxũ. Rũ ngẽmacax i ngẽxguma tamũcũxũ ingechaũgu, rũ aixcũma tayanguxẽẽ i Tupanaãrũ mugũ. ¹¹Rũ name nixĩ i tanaxũ i guxũma i ngẽma, erũ ñomaũcũũ rũ nangẽxma i muxũma i guxchaxũgũ. Rũ name nixĩ i pegũ ípemexẽẽ rũ paxa penaxũ i tórũ Coriarũ

puracü. Erü ñuxma rü noxri yaxôgüguarü yexera ningaicomachigü i ngêma ngunexü i nagu tá taxcax nataeguxü ya tórü Cori. ¹²Rü woo na naporaxü i Chataná i ñoma i nañewa i ñuxmax, natürü paxa tá nagux i ngêma, rü paxa tá ínangu ya Cristu na nügüxütawa tüxü nagagüxüçax. Rü ngêmacax name nixí i nüxü tarüxoe i guxüma i chixexü ixügüxü. Rü ñuxma na nüxü icuáxü i Tupanaärü ore, irü ngîxã yigüna tadaugü na tama nagu iyüxüçax i tacü rü chixexügü! iRü ngîxã meã tamaxê na ngêmaäcü nüxü rüyexeragüxüçax i guxüma i chixexü! ¹³iRü ngîxã mexü taxügü rü meã tamaxê! Erü aixcüma Cristuarü duüxügü tixügü, rü tanaxwaxe i nûma nanaxwaxexüäcüma tamaxê. Rü tama name na ingãxêxü rü na naxügüxü i petagü i chixexü i duüxügü nawa äügatanüxü. Rü tama name i tingêäemare rü exna to i chixexü taxügü, rü bai na yigü ichoxügagüxü, rü bai i togüchi ixaixü naxcax i norü ngêmaxügü. ¹⁴Natürü name nixí i nacümagu pexí ya tórü Cori ya Ngechuchu ya Cristu, rü nüxna naxcax peca na pexü nangüxêxüçax na meã naxcax pemaxêxüçax. Rü tama name i naxcax pedaugü na ñuxäcü pexeneärü ngüchaü na pexügüxü.

**Tama name i nüxü quixu
i cueneë i yaxôxü**

14 ¹Rü ngêxguma petanügu naxãxchaügu i wüxi i peeneë i tama perüü meã Tupanaärü orexü cuáxü, rü name nixí i meã penayaxu. Natürü tama name i namaã pegü pechoxüga naxcax i

nacümagü i nagu yaxüxü i Tupanapexewa. ²Rü dücax, nangêxma i ñuxre i taeneëgü i nagu rüxñüëxü na namexü na guxüraüxü i ñna nangôxgüxü. Natürü nangêxma i togü i taeneëgü i tama aixcüma meã Tupanaärü orexü cuaxgüxü i tama namachi ngôxgüchaüxü. Rü nûmagü nüxü nacuaxgügu rü Tupanapexewa nachuxu na tacü rü namachi nangôxgüxü, rü ngêmacax nixí i nabü rü orüxgüicacatama nangôxgüxü. ³Rü ngêxguma tangêxmagu ya texê ya namachi ngôxê, rü tama name i nüxü taxoox i ngêma togü i duüxügü i tama namachi ngôxgüxü. Rü ngêxgumariüü ta ya yíxema tama namachi ngôxê, rü tama name na nüxü tixuxü i ngêma duüxügü i namachi ngôxgüxü, erü nûmagü rü ta Tupanaärü duüxügü nixügü. ⁴¿Rü texê quixí i cuma rü ngêmacax nüxü quixu i to i coriarü duüxügü? Rü dücax, pemaã nüxü chixu rü ngêma norü cori tá nixí i nangugüxü rü ngoxi mexü naxüx i ngêma norü duüxü, rü exna tama. Rü ngêma duüxü rü Tupanapexewa rü tá name, erü nûma ya tórü Cori ya Cristu rü nüxü nangêxma i pora na nügüçax namexêäxü i ngêma duüxü. ⁵Rü dücax, nangêxma i ñuxre i duüxügü i nagu rüxñüëxü na ngüxchigaarü ngunexü rü togü i ngunexüärü yexera namexü na nagu Tupanaxü yacuaxüügüxü. Rü nangêxma i togü i duüxügü i nagu rüxñüëxü na guxüma i ngunexügü rü nawüxigüxü i Tupanapexewa. Natürü wüxichigü i yíxema rü tanaxwaxe i meã taäêwa nüxü tacuax na aixcüma Tupanapexewa namexü i ngêma taxüxü rü tixôxü. ⁶Rü yíxema duüxê ya tacü rü ngunexü Tupanacax íxüxichixe, rü ngêmaäcü tanaxü na ngêma ngunexügü tórü Corixü

ticuaxüüxüçax. Rü yíxema namachi ngóxē, rü ngēmaācü tanangōx na tórü Corixü ticuaxüüxüçax, rü Tupanana moxē taxā naxçax i ngēma tangóxü. Rü yíxema tama namachi ngóxē, rü ngēmaācü tanaxü na tórü Corixü ticuaxüüxüçax, rü tüma rü ta Tupanana moxē taxā naxçax i ngēma nabü i tangóxü. ⁷Rü ñuxma na ñoma i naānewa imaxēxü, rü taxúema tügüçaxtama tamaxü rü exna tügüçaxtama tayu. ⁸Erü ñuxma na imaxēxü, rü tórü Coriarü ngúchaü na ixügüçax nixi i imaxēxü. Rü ngëxguma iyuegu, rü ngēma rü ta tórü Corimëxëwa nangëxma. Rü ngēmaācü nüxü tadau rü woo imaxëgu rü exna woo iyuegu, rü tórü Coriarü duüxügü tixigü, rü nameçwa tangëxmagü. ⁹Rü yemacax nixi ga nayuxü ga tórü Cori ya Cristu rü wenaxäri namaxüxü na tümaäri Cori yiixüçax ya guxäma ya guxema yaxögüxe ga marü yuexe rü guxäma ya yíxema yaxögüxe ya ñuxma rü ta maxëxë. ¹⁰Rü ngëmacax Pa Chaueneëx, çrü tüxciü i nüxü quixuxü i cueneë i yaxöxü? Rü cumax, Pa To i Chaueneëx, çrü tüxciü i nüxü cuxoxü i cueneë? Erü guxätäma i yixema rü Tupanapëxewa tá tangugü na nüma tüxü nangugüçax rü ngoxi ime rü exna tama. ¹¹Erü Tupanaäri ore i ümatüxüwa rü ñanagürü ya tórü Cori:

“Ngēma aixcüma na chamaxüxüüü tá ta nixi i aixcüma guxütäma i duüxügü chopëxegu caxápüxügüxü, rü guxütäma choxü icuaxüügüxü”,

ñanagürü. ¹²Rü ngēmaācü nüxü tacuax na wüxichigü i yixema rü aixcüma tá Tupanapëxewa na ingugüxü na namaä nüxü ixuxüçax na ñuxäcü imaxëxü rü çacü na ixüxü.

Tama name i chixexügu cunanguxëë i cueneë i yaxöxü

¹³Rü ngëmacax nixi, Pa Chaueneëgüx, i tama namexü na tamüciügüxü ixuechaü. Natürü narümemae nixi i nüxü perüxoe i guxüma i çacü i peeneëgüxü pecadugu yixëxü rü exna norü öxü chixexëxü.

¹⁴Choma nüxü chacuax rü nataxuma i öna i Tupanapëxewa chixexü. Rü aixcümaxüchi nüxü chacuax i ngēma erü tórü Cori ya Ngechuchu ya Cristuari duüxü chixi, rü nüma choxü nüxü nacuaxëë i ngēma. Natürü ngëxguma chi texé nugu rüxüniugu na tama Tupanapëxewa namexü i çacü rü öna na tangóxü, rü name nixi i noxtacüma tama na tanangóxü ega nugu tarüxüniugu na tama namexü i ngēma. ¹⁵Rü ngëxguma ngēma cungóxüçax tümaäewa cunanguxëëgu ya cueneë, rü cumaä nüxü chixu rü tama aixcüma tüxü cungechaü. Rü tama name i ngēma cungóxügagu chixexügu tüxü cunguxëë rü tüxü icuyarütauxëë ya yíxema cueneë ya Cristu tümacax yuxe. ¹⁶Rü ngëmacax, woo cuxçax namexgu i ngēma cuxüxü, natürü tama name na cunaxüamaxü ega ngëmacax togü tá cuxü ixuxgu na pecadu yüxü i ngēma cuxüxü. ¹⁷Rü ngēma Tupanapëxewa na imexüçax rü tama çacü rü öna na ingóxü rü exna çacü rü axexü na ixaxüxügagu nixi. Natürü napëxewa na imexüçax rü tanaxwaxe i Naäë i Üünexüäri ngüxëemaä meä tayanguxëë i ngēma Tupana naxwaxexü rü yigümaä itarüngüxmüë rü aixcüma tataäëgu napëxewa ya Tupana. ¹⁸Rü yíxema ngēmaācü Cristuçax maxüxë, rü Tupana rü tümamaä nataäë, rü guxüma i duüxügü rü

ta tūmamaã nataãëgü. ¹⁹Rü ngēmacax, ingĩxã naxçax tadaugü i guxũma i nacũma i mexũ i yigũmaã tũxũ rüngũxmũëëxũ! İRü ngĩxã yigü tarũngũxëë na yexeraãcü iyaëxũçax i tórü öwa rü Tupanaãrũ orewa! ²⁰Rü tama name i tacü rü öna na cungóxũgagu icuyanax-oxëë i Tupanaãrũ puracü i cueneëãrũ maxũwa. Rü aixcũma nixĩ i guxũma i önağü i namexũ i Tupanapexewa. Natĩrũ wũxi i chixexũ nixĩ ega ngēma öna i ingóxũgagu chixexũgu nayixëëgu i taeneëgü. ²¹Rü ngēmacax tama name i cunangóx i namachi, rü ẽxna cuyaxaxü ya binu, rü ẽxna cunaxü i tacü i to, ega ngēmagagu chixexũgu cunanguxëëgu i cueneë i yaxóxũ. ²²Rü ngëxguma cuma nagu curĩxĩnũgu na namexũ na cunangóxũ i ngëxũrũũxũmare i öna, rü Tupanapexewa rü name nixĩ i cuxicatama nüxũ cucuax i ngēma. Rü tataãë ya yĩxema tũmaãëwa nüxũ cuãxe na Tupanapexewa namexũ i ngēma taxĩxũ. ²³Natĩrũ ngëxguma wũxie nagu rũxĩnũgu na tama namexũ i Tupanapexewa na tacü rü öna na tangóxũ, rü pemaã nüxũ chixu rü chixexũ taxü ega tanangóxomagu, erü tũmaãëwa nagu tarũxĩnũ na tama aixcũma namexũ i ngēma taxĩxũ. Rü guxũma i ngēma tũmaãëwa nagu tarũxĩnũxũ na nachixexũ rü aixcũma pecadu taxü ega tanaxũamagu.

**Name nixĩ i cueneëãrũ ngũchaũ
cuxü rü tama i cuxrũtama**

15 ¹Rü yixema na meã yaxóğũxũ rü namaã iporaexũ i guxchaxũğü, rü name nixĩ i nüxũ tarũngũxëë i ngēma taeneëgü i turaexũ i norü öwa rü tama guxchaxũğũmaã yaxna ĩnüëxũ. Rü tama name i

yigũguxicatama tarũxĩnũë rü tóxrũçaxicatama tadaugü. ²Natĩrũ wũxichigü i yixema rü name nixĩ i taeneëãxũ tanangũchaũxëë na ngēmaãcü nüxũ rüngũxëëxũçax na yexeraãcü yaxóöxũçax. ³Yerü woo ga Cristu rü tama noxrũtama ngũchaũ naxü. Natĩrũ nayanguxëë ga yema Tupanaãrũ ore ga ñaxũ:

“Pa Chaunatũx, rü ngēma duũxũğü i cumaã guxchigagũxũ, rü chomaã nixĩ i naguxchigagũxũ”,

ñaxũ. ⁴Rü guxũma ga yema nuxcũma ũmatũxũ ga Tupanaãrũ orewa, rü naxũmatü na tũxũ nanguxëëxũçax na taguma nüxũ rũxoexũ ega woo tacü rü guxchaxũ tũxũ ũpetũgu. Rü yema Tupanaãrũ ore rü naxũmatü na tũxũ nataãëxëëxũçax rü tũxũ nüxũ nacuağëëxũçax na aixcũma Tupanaãrũ ixĩğũxũ. ⁵Rü Tupana nixĩ ya tũxũ rüngũxëëcü na yaxna namaã ixĩnüëxũçax i guxũma i guxchaxũğü. Rü nüma nixĩ i tũxũ nataãëxëëxũ. Rü chanaxwaxe i nüma ya Tupana pexũ narũngũxëë na aixcũma pegü pengechaũğüechaxũçax i ngēma Ngechuchu ya Cristu pexũ naxwaxexũrũũ. ⁶Rü chanaxwaxe na ngēmaãcü pemaxëxũ na guxãma i pema rü wũxigu nüxũ picuağũğũğũçax ya Tupana ya Nanatü ya tórü Cori ya Ngechuchu ya Cristu.

**Duũxũğü i tama Yudũğü ixĩğũxũmaã
nüxũ nixu i ore i mexũ**

⁷Rü ngēmacax, yema Cristu pexũ na dexũrũũ rü name nixĩ i wũxichigü meã pegü peyaxu na ngēmaãcü Tupanaxũ

yacuaxüüügüxcax i duüxügü. ⁸Rü pemañ nuxü chixu rü Cristu núma naxü na Yudfugüxü yanangüxëxüxcax, na yemaacü yanguxëëxüxcax ga yema uneta ga nuxcümaügüxü ga tórü oxigümañ nuxü yaxuxü ga Tupana. Rü yemaacü ga Cristu rü tüxü nuxü nadauxëë na aixcümacu na yixü ya Tupana rü aixcüma yanguxëëxü i ngëma norü uneta. ⁹Rü yexgumarüü ta ga Cristu rü núma naxü naxcax i ngëma duüxügü i tama Yudfugü ixigüxü na nümagü rü ta Tupanaxü yacuaxüüügüxcax naxcax na poraacü Tupanañ nangechaütümüügüxü. Rü yemachiga nixi ga yema Tupanaärü ore ga Dabí ümatüxü ga ñaxü:

“Rü ngëmacax guxü i nachiüñanecüñax i duüxügüpexewa tá cuxü chicuaxüü. Rü tá chorü wiyawa cuxü chataxëë”,

ñaxü. ¹⁰Rü toxnamana i Tupanaärü ore i ümatüxüwa rü ñanagürü:

“Pa Duüxügü i Tama Yudfugü Ixigüxü, rü name nixi i pema rü wüxigu chorü duüxügü i Yudfugümañ petaäëgü”,

ñanagürü. ¹¹Rü toxnamana, rü ñanagürü ta:

“Pa Duüxügü i Tama Yudfugü Ixigüxü, rü name nixi i nuxü picuaxüügü ya tórü Cori. Rü Pa Guxüma i Nachiüñanecüñax i Duüxügü, rü name nixi i penataxëë”,

ñanagürü. ¹²Rü Ichaífa rü ta nanaxümatü rü ñanagürü:

“Rü Dabí nanatü ya Ichaíwa tá ne naxü i wüxi i nataa i tá Cristu

ixixü. Rü nüma tá nixi i norü äëxgacü yixü i guxüma i ngëma duüxügü i tama Yudfugü ixigüxü. Rü ngëma duüxügü rü tá aixcüma nuxü nayaxögü rü tá ínananguxëëgü na yimagagu Tupana nuxü rüngüxëëgüxü”,

ñanagürü. ¹³Rü ñuxma i pema na nuxü payaxögüxü rü chanaxwaxe i poraacü pexü nataäëxëë ya yima Tupana ya pexü rüngüxëëcü na meñ Cristuxü ípenanguxëëgüxcax. Rü ngëmaacü i Tupanaäë i Üünexü rü tá pexü naporaexëë na yexeraacü Cristuxü ípenanguxëëgüxcax. ¹⁴Pa Chaueneëgüx, meñma nuxü chacuax na guxü i duüxügümañ pemecümaxü, rü aixcüma Tupanaxü na pecuaxü, rü aixcüma meñma pegü pixucyxëgüxü.

¹⁵Natürü ñañ poperawa rü meñma pexcax chanaxümatü i ñuxre i Tupanaärü ucuxëgü, erü tama chanaxwaxe i nuxü ipeyarüngümaë. Rü tama chamuü na pexcax chanaxümatüxü i ngëmachiga yerü Tupana nixi ga choxü mucü na pemañ nuxü chixuxüxcax. ¹⁶Rü nüma nixi ga choxü namuxü na Ngechuchu ya Cristuarü puracü chaxüxcax i natanüwa i ngëma duüxügü i tama Yudfugü ixigüxü. Rü ngëma puracü ga nawa choxü namuxü nixi na ngëma duüxügümañ nuxü chixuxü i ore i mexü na Tupanaxütawa chanagagüxcax, na wüxi i ämare i Tupana namañ taäëxü i ngëma duüxügü i Naäë i Üünexü imexëëgüxü. ¹⁷Rü ñuxma na Ngechuchu ya Cristuarü duüxü na chixü, rü ngëmacax chataäë namañ i ngëma

puracü i Tupanaāxū chaxūxū. ¹⁸⁻¹⁹Rü ñuxma rü yema Cristu chorü maxūwa üxūchigaxūxīcatama nixī i chixuxū. Rü nüma nixī ga choxū nangūxēxū na Tupanaxūtawa chanagagūxūcax ga yema duūxūgü i tama Yudfugü ixīgūxū, na nūmagü rü ta Tupanaga naxīnūēxūcax. Rü yemaācū chorü oremaā, rü chorü puracūmaā, rü cuaxruūgü ga taxū ga Tupana üxūmaā, rü Naāe i Üünexūārū poramaā Tupanaxūtawa chanagagü ga yema duūxūgü. Rü yemaācū Yerucharēūwa rü guxūwama ñuxmata Ilfuciarü naānewa meāma chayanguxēē na nüxū chixuxū ga yema ore i tüxū maxēxēxū i Cristuchiga. ²⁰Rü yemaācū chapuracü na nüxū chixuxūcax ga Tupanaārū ore i mexū ga ngextā taguma ñuxgu Cristuchigaxū ínaxīnūēxūwa ga duūxūgü. Yerü tama chanaxwaxe ga marü togü nüxū íxuxūwa rü duūxūgü marü nüxū ícuáxūwa nüxū na chixuxū ga yema ore. ²¹Rü yemachiga nixī ga Tupanaārū ore ga Ichafa ūmatūxū ga ñaxū:

“Rü yíxema taguma Cristuchigaxū cuaxgūxe, rü taguma nachigaxū ínūēxē, rü tá nüxū tacuaxgü i nachiga”,

ñaxū.

Pauru rü Dumawa naxūxchaū

²²Rü yema toxnamana na chapuracūxūcax nixī ga taxucürüwa petanüwa chaxūxū woo muēxpūxcünachirex yéma chaxūxchaū. ²³Natürü ñuxma na marü chanaguxēxū i ngēma puracü i toxnamana, rü nagu charūxīnū na petanüwa chaxūxū. Yerü

ñuxgumamatama nixī ga nagu charūxīnūēchaxū na petanüwa chaxūxchaūxū. ²⁴Rü ngēxguma Españawa chaxūxgu, rü nagu charūxīnū na woe pexūtagu íchidauxū. Rü nagu charūxīnū na ñuxre i ngunexū ngēxma petanüga charūxāxū. Rü wūxi i chorü taāē tá nixī i ngēma. Rü ngēmawena rü chanaxwaxe i choxū perüngūxēē na Españawa chaxūxūcax. ²⁵Natürü i ñuxma rü Yerucharēūwa tá chaxū, na ngēma chanangexūcax i ñuxre i dīeru naxcax i taeneēgü i ngēma ngēxmagūxū. ²⁶Erü ngēma taeneēgü i yaxōgūxū i Machedóniāānewa rü Acayaanewa ngēxmagūxū, rü norü ngúchaūmaā nagu narūxīnūē na ngīxū nanutaquexegūxū i ñuxre i dīeru na ngēmaācū nüxū nangūxēēgūxūcax i taeneēgü i nüxū nataxuxū i Yerucharēūwa ngēxmagūxū. ²⁷Rü ngēma taeneēgü i Machedóniācūāx rü Acayacūāx rü norü me nixī na ngēmaācū naxūgūāxū. Rü ngēma duūxūgü rü aixcūma nüxū nangēxma i norü ngetanü i taeneēgü i Yudfugütanüwa. Erü ngēma taeneēgü i Yudfugügagu nixī i ngēma togü i duūxūgütanüwa nanguxū i Tupanaārū ore. Rü ñuxma rü name nixī i ngēma togü i duūxūgü rü norü ngēmaxūmaā taeneēgü i Yudfugü i yaxōgūxūxū narüngūxēēgü. ²⁸Rü ngēxguma chanaguxēēgu i ngēma puracü, rü ngēxguma taeneēgü i Yudfugūna marü ngīxū chaxāxgu i ngēma dīeru, rü Españawa tá chaxū. Rü ngēxguma ngēma chaxūxgu, rü tá woe pexūtagu íchidau. ²⁹Rü nüxū chacuax rü ngēxguma petanüwa changuxgu, rü wūxigu tá tataāēgü, erü nüma ya Cristu

tá tüxũ nataãẽxẽ i ngẽxguma
ngẽmaãcü wũxiwa ingẽxmagügu. ³⁰Pa
Chaueneẽgüx, tórü Cori ya Ngechuchu
ya Cristuégagu, rü ngẽma na Naãẽrũ
ngũxẽemaã choxũ pengechaũxũgagu
pexũ chacaaxũ na Tupanana chauxcax
peçaxũ i perũ yumüxewa. Rü ngẽmaãcü
tá choxũ perüngũxẽ nawa i ñaã puracü
i Tupana choxna ãxũ. ³¹iRü Tupanana
peça na choxũ ínapoxũxũcax nüxna i
ngẽma Yudügu i Yudéaanewa
ngẽxmagüxũ i tama yaxögüxũ! iRü
nüxna peça naxcax i ngẽma taeneẽgü i
yaxögüxũ i Yerucharéüwa ngẽxmagüxũ,
na taãẽacüma nayauxgũãxũcax i ngẽma
díeru i ngẽma naxcax changexũ! ³²Rü
ngẽmaãcü ngẽxguma Tupana
naxwaxegu, rü taãẽacüma petanüwa tá
changu, na wüxigu pemaã
chataãẽxũcax. ³³Rü chanaxwaxe na
pemaã inaxáxũxũ ya Tupana ya tüxũ
taãẽxẽcü. Rü ngẽmaãcü yĩ.

**Paurü rü nüxũ narümoxe ga yema
duũxũgü ga yaxögüxũ ga
Dumawa yexmagüxũ**

16 ¹Rü ñuxma na petanüwa
naxũxchaũxũ i taeyax i Febe, rü
pemaã ngĩxũ chixu rü wüxi i taeyax i
mecü iyixĩ. Erü ngĩma rü nüxũ
irüngũxẽ i ngẽma yaxögüxũ i
Chẽcreaarũ íanewa ngẽxmagüxũ. ²Rü
chanaxwaxe i meã ngĩxũ peyaxu,
naégagu ya tórü Cori ya Ngechuchu, erü
ngẽma nixĩ i mexũ na penaxũxũ namaã
i guxũma i yaxögüxũ. Rü chanaxwaxe i
guxũma i tacü i ngĩxũ taxuxüwa rü
ngĩxũ perüngũxẽ, erü ngĩma rü
poraãcü togüxũ irüngũxẽ, rü choxũ rü
ta irüngũxẽ. ³iRü nüxũ perümoxe gũ i

Prisila rü Aquiru! Rü nümagü rü
chomücügü nixĩgü i Ngechuchu ya
Cristuarü puracüwa. ⁴Rü nümagü rü
ãcũmaxüwa nichocu na chauétüwa
nachogüexũcax, na tama chayuxũcax ga
chomax. Rü ngẽmacax moxẽ nüxna
chaxã. Rü tama chaxicatama moxẽ
naxcax nüxna chaxã, natürü moxẽ
nüxna naxägü ta i guxũma i taeneẽgü i
yaxögüxũ i tama Yudügu ixĩgüxũ. ⁵iRü
nüxũ perümoxe gũ ta i guxũma i
taeneẽgü i Aquirupatawa
ngutaquexegüxũ! iRü ngẽxgumarüü ta
nüxũ perümoxe gũ ya chomücü ya nüxũ
changechaũcü ya Epenétu! Rü nüma
nixĩ ga nüxĩra Cristuaxũ yaxõõxũ ga
Áchiaanewa. ⁶iRü ngĩxũ perümoxe gũ i
María ga poraãcü petanüwa Tupanaãxũ
puracücü! ⁷iRü nüxũ perümoxe gũ i
chautanüxũgü i Aũdrünicu rü Yúniã ga
wüxigu chomaã poxcuexũ! Rü nümagü
nixĩ i yatügü i aixcuma Tupana
imugüxũ i guxũma i yaxögüxũ nüxũ
ngechaũgüxũ. Rü nümagü rü nüxĩra
chauxüpa Cristuaxũ nayaxögü. ⁸iRü
nüxũ perümoxe gũ ya Aũpriátu ya
chomücü ya nüxũ changechaũcü ya
chauxrü tórü Coriaxũ yaxõcü! ⁹iRü
nüxũ perümoxe gũ ya Urubánu ya
tomücü ixĩcü i Cristuarü puracüwa! iRü
ngẽxgumarüü ta nüxũ perümoxe gũ ya
Estaqui ya nüxũ changechaũcü! ¹⁰iRü
nüxũ perümoxe gũ ya Apere ya aixcuma
tüxũ nüxũ dauxẽcü na ñuxacü
Cristuaxũ yaxõõxũ! iRü ngẽxgumarüü ta
nüxũ perümoxe gũ i Aritúburutanüxũgü!
¹¹iRü nüxũ perümoxe gũ i chautanüxũ i
Erudíu! iRü ngẽxgumarüü ta nüxũ
perümoxe gũ i Narsíchutanüxũ i tórü
Coriaxũ yaxögüxũ! ¹²iRü ngĩxũ

perūmoxēgū i Trifena rü Trifocha! Rü ngēmagū rü tórü Coriaxū ipuracüe. iRü ngēxgumarūū ta ngīxū perūmoxēgū i taeyax i Péchida i ngīxū ingechaūgücū! Rü ngīma rü marū poraācū tórü Coriaxū ipuracū. ¹³iRü nüxū perūmoxēgū ya Rufu ya aixcūma meā tórü Coriaxū yaxōcū! iRü ngēxgumarūū ta ngīxū perūmoxēgū i naē ga chauerūū chomaā ixīcū! ¹⁴iRü nüxū perūmoxēgū i Achícritu, rü Peregüte, rü Erme, rü Patroba, rü Erma, rü guxūma i togū i taeneēgū i natanūwa ngēxmagūxū! ¹⁵iRü nüxū perūmoxēgū ta i Firórugu, rü Yúria, rü Neréu, rü naēyax, rü Oripa, rü guxūma i togū i taeneēgū i yaxōgūxū i natanūwa ngēxmagūxū! ¹⁶Rü chanaxwaxe i pegū pengechaūgüācūma pegū perūmoxēgū i wūxichigū. Rü guxūma i ngēma yaxōgūxū i toxnamana ngēxmagūxū, rü pexū narūmoxēgū. ¹⁷Pa Chaueneēgūx, pexū chacaaxū na pegūna pedaugūxūcax nüxna i ngēma duūxūgū i pexū itoyechaūxū rü chixexūgu pexū yixēēgūchaūxū. Erü ngēma duūxūgūarü nguxēētae rü tama namaā nawūxigu i ngēma nguxēētae ga noxri peyaxūgūxū ga yexguma noxri peyaxōgūgu. Rü name nixī i noxtacūma nüxna pixīgachi i ngēma duūxūgū rü tama natanūgu pexāgū. ¹⁸Erü ngēma duūxūgū rü tama tórü Cori ya Ngechuchu ya Cristuarü ngūchaū naxūgū, natürü noxrütama ngūchaū nixī i naxūgūxū. Rü ore i tauxchaxūgūmaā nayaxucūxēgū i duūxūgū, rü ngēmaācū nanawomūxēēgū i ngēma duūxūgū i tama meā nüxū cuaxgūxū. ¹⁹Rü guxūma i duūxūgū nüxū nacuaxgū na aixcūma meā Tupanaga pexīnūēxū i pemax. Rü ngēmacax

pemaā chataāē i chomax. Rü chanaxwaxe na meā nüxū pecuáxū i tacū nixī i mexū i Tupanapexewa na penaxūxūcax i ngēma. Natürü ngēma Tupanapexewa chixexū, rü inūxna pixīgachi na tama nagu peyixūcax! ²⁰Rü ngēxguma ngēmaācū meā pemaxēgu rü nüma ya Tanatū ya Tupana ya tūxū taāēxēēcū rü tá pexū naporaexēē na aixcūma nüxū perüyexeraxūcax i Chataná. Rü chanaxwaxe i tórü Cori ya Ngechuchu ya Cristu pemaā inarūxāxū rü pexū narūngūxēē. ²¹Rü pexū narūmoxē ya Timutéu ya chomūcū ixīcū i Tupanaārū puracūwa. Rü ngēxgumarūū ta pexū narūmoxēgū i chautanūxūgū i Dúchiu, rü Yachóū rü Sochípatru. ²²Rü choma i Téchiu na chanaxūmatūxū i ñaā popera, rü choma rü ta pexū charūmoxē naēgagu ya tórü Cori. ²³Rü pexū narūmoxē ta ya Gayu ya napatawa changēxmacū. Rü nüma rü inanaxā ya daa napata na nawa nangutaquexegūxūcax i guxūma i yaxōgūxū. Rü ngēxgumarūū ta pexū narūmoxēgū i Eratu i daa jāneārū dīēuarü dauruū ixīxū, rü taeneē i Cuartu. ²⁴Rü chanaxwaxe i tórü Cori ya Ngechuchu ya Cristu pexū narūngūxēē i guxāma i pemax. Rü ngēmaācū yīi.

**Pauru rü Tupanaxū yacuaxūūācūma
nanaguxēē i norü popera**

²⁵⁻²⁶iRü nüxmax, rü ngīxā nüxū ticuaxūūgū ya Tanatū ya Tupana! Rü nüma nüxū nangēxma i pora na pexū naporaexēēxūcax na meā peyaxōgūamaxūcax i ngēma norü ore i tūxū maxēxēēxū tamaā nüxū ixuxūrūū. Rü ngēma nixī i ore i guxūwama nüxū

chixuxũ rü namaã changúexẽẽtaexũ i
 Ngechuchu ya Cristuchiga. Rü
 ngẽmatama ore i Cristuchiga rü
 taxchaxwa naxẽũgu ga noxrix, natürü i
 ñuxma ya Tupana rü marü tüxũ nüxũ
 nacuaẽẽ i ngẽma. Rü nuxcũma tauta
 naãne üxgu rü Tupanaxĩcatama nüxũ
 nacuaõ ga yema, natürü i ñuxma rü
 norü orearü uruũgü ümatüxũ ga orewa
 taxcax nanangoxẽẽ. Rü ngẽma ore rü
 namaã nawüxigu ga yema ore ga
 nuxcũma nüxũ yaxuxũ ga Tupana ya
 guxũguma maxẽchacü. Rü ñuxma ya

Tupana rü guxũwama nanamugü i norü
 orearü uruũgü na guxũ i duũxũgũmaã
 nüxũ na yaxugüexũcax i ngẽma ore i
 Cristuchiga na nüxũ yaxõgüãxũcax rü
 naga na naxĩnüexũcax. ²⁷Rü nüma ya
 Tupana rü nüxĩcatama nixĩ i Tupana
 yĩxũ, rü nüxĩcatama nixĩ i guxũxũ
 nacuaũ. iRü ñuxmax, rü ngĩã
 guxũguma nüxũ ticuaõũgü, erü Nane
 ya Ngechuchu ya Cristu rü poraãcü tüxũ
 narũngũxẽẽ! Rü ngẽmaãcü yĩ.

*Rü nuãma pexna,
 Pauru*